


明史藁

傳十八之廿一



漢書門			
三	六	八	七
五	八	一	八
類	號	函	架
冊	冊	冊	冊

內閣文庫			
三	六	八	七
五	八	一	八
類	號	函	架
冊	冊	冊	冊

內閣文庫	
番號	漢 8835
冊數	78 (33)
函號	281 39




A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



明史藁

列傳第十八

光祿大夫 經筵講官明史總裁戶部尚書加七級臣王鴻緒奉

敕編撰

劉基子璉宋濂

葉琛

章溢子存道

劉基字伯溫青田人先世代有顯者五傳至濂仕宋為翰林
掌書宋亡邑子林融倡義族復宋事敗元遣使簿錄其黨將
盡殲焉使道宿濂家濂醉使者而焚其廬籍悉毀因以語動
使者而更其籍全活連染者無筭基幼穎異於經史無不通
貫基師鄭復初謂基父爚曰活萬人者封爾祖德厚此子必
高公之門矣元至順間舉進士除高安丞有廉直聲行省辟

之謝去起爲江浙儒學副提舉論御史失職爲臺臣所阻再
投劾歸基初於燕市得天文書一夕而誦其言及承高安進
賢鄧祥甫者精象緯學盡以其術授之愈洞其要嘗遊西湖
有異雲起西北光射湖中同遊者魯淵宇文公諒輩以爲慶
雲將紀以詩基縱飲徐言曰此天子氣也應在金陵十年後
常有王者起其下時東南猶全盛皆駭基爲狂言無能知基
者惟西蜀趙天澤以爲諸葛孔明儔也未幾方國珍起海上
掠郡縣衆盛不能制行省復辟基爲元帥府都事基議築慶
元諸城以逼賊國珍氣沮及左丞帖里帖木兒招諭國珍基
言方氏兄弟首亂宜捕誅之而撫其脅從者國珍懼厚賂基
基不受持益堅行省以請於朝國珍乃使人浮海至燕京賄

用事者遂詔撫國珍授以官而責基擅威福羈管紹興方氏
遂愈橫亡何行省復辟基勦捕山寇基自募兵畧定其地畧
行省郎中與行院判石抹宜孫守處州經畧使李國鳳上其
功執政以方氏故抑之授總管府判不與兵事基遂棄官還
青田著郁離子以見志時避方氏者爭依基基稍爲部署寇
不敢犯及太祖下金華定括蒼總制孫炎以上命致書幣基
素以金陵有王氣知天命有歸遂飭弟陞護衆保境以拒方
氏獨與章溢葉琛等間道詣應天陳時務十八策太祖大喜
語基先生有至計毋惜盡言於是築禮賢館以處基等寵禮
甚至會陳友諒領國入寇勢張甚諸將或議降或議奔據鍾
山或請決一戰基張目不言太祖召入內基奮曰先斬主降

及奔者太祖曰先生計安出基曰賊驕矣待其深入伏兵邀取之易耳天道後舉者勝取威制敵以成王業在此舉矣遂用其策誘致友諒大破之斬獲數萬以克敵賞賞基不受太祖故遙奉小明王元旦中書省設御座將行慶賀禮基大叱曰牧豎爾奉之何爲不拜因見太祖陳天命所在太祖感悟遂與基定征取計會友諒兵復陷安慶太祖欲自將討之以問基基曰今天象金星在前火星在後此勝氣也太祖大喜卽出師攻安慶自旦及昏不下基請逕趨江州擣其巢穴遂悉軍西上友諒出不意率妻子奔武昌江州降其龍興守將胡廷瑞遣子通欵請禁止數事勿散其部曲太祖有難色基從後躡胡床太祖悟許之廷瑞降江西諸郡皆下基喪母值

兵事未敢言至是請還葬會苗軍反殺金處守將胡大海耿再成等浙東動搖甚至衢爲守將夏毅諭安諸屬邑復與平章邵榮等謀復處州擒首寇亂遂定國珍素畏基致書唁基答書宣示太祖威德國珍遂納土入貢太祖數以書卽家訪軍國事基條答悉懸中尋赴京道建德適張士誠兵入寇左丞李文忠欲擊之基曰不出三日賊自走比期趨出兵則壁已空矣追敗之東陽悉獲其衆甚至京太祖方親率兵救小明王基曰漢吳伺隙未可動也太祖不聽趨安豐友諒聞之乘間圍洪都初太祖議用師所向諸將以吳地饒易取漢強宜後基曰士誠自守虜也友諒據上流且名號不正乃心無日忘我宜先伐陳氏陳氏滅張氏囊中物耳太祖以爲然至

是解安豐之圍歸謂基曰不聽君言幾失計遂自將救洪都與友諒大戰鄱陽湖一日數十接礮聲震天太祖坐胡床督戰基侍側忽躍起大呼趣太祖更舟太祖倉遽徙別舸坐未定飛礮擊舊所御舟立碎友諒乘高見之大喜而太祖舟更進漢軍皆失色時湖中相持三日未決基請移軍湖口以金木相犯日決勝太祖從之遂殲友諒其後太祖取士誠北伐中原遂成帝業基密謀居多太祖或時至基所屏人語移時乃去吳元年以基爲太史令上戊申大統曆日中有黑子占東南失大將已而胡深戰歿熒惑守心請下詔罪已大旱請決滯獄卽命基平反兩隨注因請立法定制以止濫殺太祖方欲刑人基請其故太祖語之夢基以爲得土得衆象宜停

刑以待後三日海寧降太祖喜悉付基縱之中書參政張景元故臣使人上書頌功德勸及時娛樂基曰是欲爲趙高者景憾基嗾齊巖言基陰事未發景誅會司天臺災翼巖遂訐奏基太祖怒詰責翼巖得其與景通謀狀斬之洪武改元太祖卽皇帝位基奏立軍衛法拜御史中丞兼太史令處州定稅糧視宋制畝加五合惟青田命母加曰令伯溫鄉里世世爲美談也帝幸汴梁使基同左丞相善長居守基謂宋元寬縱失天下今開國宜肅紀綱令御史糾劾無所避宿衛宦侍有過者皆啓皇太子置之法人憚其嚴中書省都事李彬坐貪縱抵罪善長素暱之請緩其獄基不聽馳奏報可方祈雨卽斬之由是與善長忤帝歸愬基僇人壇壝下不敬諸怨

基者亦交譖之會以早求言基奏士卒物故者其妻悉處別營凡數萬人陰氣鬱結工匠死齒齧暴露吳將吏降者皆編軍戶誠足干害和氣帝納其言旬日仍不雨帝怒基遂請告歸時帝方營中都又銳意滅擴廓基瀕行奏曰鳳陽雖帝鄉非建都地王保保未可輕也已而定西失利擴廓竟走沙漠迨爲邊患其冬帝手詔叙基勲伐召赴京賜賚甚厚追贈基祖父皆永嘉郡公累欲進基爵基固辭不受初太祖以事責丞相李善長基言善長勲舊能調和諸將太祖曰是數欲害君君乃爲之地耶吾行相君矣基首觸地曰是如易柱須得大木若束小木爲之且立覆太祖意解及善長罷帝欲相楊憲憲素善基基力言不可帝怪之曰憲有相才無相器夫宰

相者持心如水以義理爲權衡而已無與者也憲則不然問汪廣洋曰此福淺殆甚於憲問胡惟庸曰譬之駕懼其僨轅也帝曰吾之相誠無逾先生基曰臣疾惡太甚又耐繁劇爲之且孤上恩天下何患無才惟明主悉心求之目前諸人誠未見其可也後憲廣洋惟庸皆敗三年授弘文館學士十一月大封功臣封基開國輔運守正文臣資善大夫上護軍誠意伯祿二百五十石明年賜歸老於鄉帝嘗手書問天象基悉條答而焚其草大要言霜雪之後必有陽春今國威已立宜少濟以寬大云基佐帝定天下料事如神明性剛嫉惡與物多忤至是還隱山中惟飲酒奕棋口不言功令求見不得微服爲野人謁基基方濯足令從之引入茅舍炊黍飯令

令告曰某青田知縣也基驚起稱民因別去後終不得見其
韜跡如此然究爲惟庸所中既括間有隙地曰談洋南抵閩
界爲盜藪方氏所出亂基常言於帝設巡檢司守之奸民
弗便也茗洋周廣三反吏匿不以聞基令長子璉徑奏其事
不先白中書省胡惟庸方以左丞掌省事挾前怨使吏訐基
談洋地有王氣圖爲墓民弗與則請立巡檢逐民居帝雖不
以罪基頗爲動遂奪基祿基懼急詣帝謝乃留京師不敢歸
未幾惟庸相基大感曰使吾言不驗蒼生福也憂憤遂疾作
八年正月惟庸挾醫來飲其藥有物積中如拳石問白帝帝
不省自是疾篤三月帝親製文賜之遣使護歸居一月卒年
六十五卒前數日以天文書授子璉曰亟上之無令後人習

也謂次子璟曰諸形勝要害之地宜與京師聲勢連絡爲政
寬猛如循環宜修德省刑祈天永命我欲爲遺表惟庸在無
益也敗後上必思我有所問以是密奏之久之中丞涂節首
惟庸逆謀并及毒死基狀惟庸遂誅基虬髯貌修偉慷慨有
大節論天下安危義形於色帝察其至誠任以心膂基亦自
謂不世遇知無不言每遇急難勇氣奮發計畫立就決機呼
吸人莫能測暇則敷陳王道帝每恭已以聽常呼爲老先生
而不名曰吾子房也又曰數以孔子之言導子顧帷幄語祕
莫能詳而世所傳爲神奇多陰陽風角之說非其至也所爲
文章氣昌而奇與宋濂並爲一代之宗云子璉璉字孟藻
有文行洪武十年授考功監丞試監察御史出爲江西參政

太祖常欲大用之爲惟庸黨所脅墮并死璉子鴈字士端洪武二十三年嗣伯食祿五百石初基爵止及身至是帝追念基功又憫基父子皆爲惟庸所厄命增其祿于世襲其明年坐事貶秩歸里築室鷄山下命曰盤谷洪武末坐事戍甘肅尋赦還建文帝及成祖皆欲用之以奉親守墓力辭永樂間卒子法停襲景泰三年命錄基後授法曾孫祿世襲五經博士弘治十三年給事中吳士偉言基子孫宜世爵乃命祿孫瑜爲處州衛指揮使正德九年加贈基太師諡文成嘉靖十年刑部郎中李瑜言基宜侑享高廟世封爵如中山王達下廷臣議僉言高帝收攬賢豪創造基業一時佐命功臣並軌宣翼而帷幄奇謀中原大計注注屬基故在軍有子房之稱

剖符發諸葛之喻基亡之後孫鴈實嗣太祖召諭再三鐵券丹書誓言世祿庶嗣爵未幾旋即隕世褫圭裳於末裔委帶礪於空言或謂後嗣孤貧弗克負荷或謂長陵紹統遂至猜嫌雖一辱泥塗傳聞多謬而載書盟府績效具存昔武王興滅天下歸心成季無後君子所嘆基宜侑享太廟其九世孫瑜宜嗣伯爵與世券制曰可瑜嗣伯卒孫世延嗣嘉靖季年南京振武營之變世延掌右軍都督府事撫定亂卒由此自負數上封事不報忿而恣橫屢抵法萬曆三十四年復坐罪論死卒適孫萊臣年幼庶兄蓋臣借襲其爵蓋臣卒萊臣當襲蓋臣子孔昭復據之崇禎時出督南京操江捕萊臣斃之獄福王立與馬士英阮大鍼比及士英大鍼俱遁降死孔昭

航海去不知所終

璟字仲璟基次子弱冠通諸經太祖念基每歲召璟同章溢子允戴葉琛子永道胡深子伯機入見便殿燕語如家人洪武二十三年命襲父爵璟言有長兄子廌在帝大喜命廌襲封以璟爲閤門使且諭之曰考宋制閤門使卽儀禮司朕欲汝日夕左右以宣達爲職不特禮儀也帝臨朝輒侍班百官奏事有闕遺者隨事糾正都御史袁泰奏車牛事失實帝宥之泰忘引謝璟糾之服罪帝因諭璟凡似此者卽面糾朕雖不之罪要令知朝廷紀綱已復令同法司錄冤滯谷王就封擢爲谷府左長史璟論說英侃喜談兵初温州賊葉丁香叛延安侯唐勝宗討之決策於璟破賊還稱璟才畧帝喜曰璟

直伯溫兒矣嘗與成祖奕成祖曰卿不少讓耶璟正色曰可讓處則讓不可讓者不敢讓也成祖默然靖難兵起璟獻十六策不聽令參李景隆軍事景隆敗璟夜渡盧溝河水裂馬陷冒雪跛行三十里子縉自大同赴難遇之良鄉與俱歸上聞見錄不省成祖卽位召璟稱疾不至逮入京但稱殿下且云殿下百世後逃不得一篡字下獄自經死法官希旨緣坐其家成祖以基故不許宣德二年授縉刑部照磨福王時贈大理少卿諡剛節

宋濂字景濂其先金華之潛溪人至濂乃遷浦江幼英敏善記有鄉先生延見之抽架上雜書俾記五百言濂以指按行按畢成誦鄉先生大驚攜就學於聞人夢吉所通五經其友

胡翰曰舉子業不足溷景濂。盍學古文辭乎。乃往從吳萊學。已遊柳貫黃潛之門。兩人皆大儒。亟遜濂。自謂弗如。元至正中。薦授翰林編修。辭不行。入龍門山著書。踰十餘年。太祖取婺州。召見濂。還金陵。復有以劉基章溢葉琛薦者。乃使使以書幣徵濂等四人。濂歎曰。吾聞大亂極而直人生。斯其時矣。遂與基等俱入見。除江南儒學提舉。兼命授太子經。尋改起居注。濂長基一歲。皆起東南。負重名。基雄邁有奇氣。而濂自命儒者。俱被徵。基遂佐軍中謀議。濂亦首用文學。受知恆侍左右。備顧問。嘗召講春秋。左氏傳。濂進曰。春秋乃孔子褒善貶惡之書。苟能遵行。則賞罰適中。天下可定也。太祖御端門口。釋黃石公三畧。濂進曰。尚書二典三謨。帝王大經大法。畢

具願留意講明之。已論賞賚。復曰。得天下以人心為本。人心不固。雖金帛充牣。將焉用之。太祖悉稱善。久之以疾告歸。太祖與太子並加勞賜。濂上箋謝。并奉書太子。勉以孝友敬恭。進德修業。以副天下之望。太祖覽書大悅。召太子為語書意。賜札褒答焉。洪武二年。召充元史總裁官。除翰林院學士。知制誥。兼修國史。其明年以失朝參降。編修四年。遷國子司業。坐議孔廟祀典忤旨。謫安遠知縣。旋召為禮部主事。明年遷贊善大夫。皇太子一言動。濂皆以禮法諷諭。使歸於道。至有關政教及前代興亡事。必拱手曰。當如是不當如彼。皇太子每斂容嘉納。言必稱師。父云。帝剖符封功臣。召濂議五等封爵。宿大本堂討論。達旦。歷據漢唐故實。量其中而奏之。甘露

屢降帝問災祥之故對曰受命不於天於其人休符不於祥於其仁春秋書異不書祥爲是故也皇從子文正得罪進曰文正固當死陛下體親親之誼置諸遠地則善矣車駕祀方丘患心不寧濂從容言曰養心莫善於寡欲審能行之則心清而身泰矣帝稱善者良久嘗問以帝王之學何書爲要濂舉大學衍義乃命大書揭之殿兩廡壁頃之御西廡諸大臣皆在帝指衍義中司馬遷論黃老事命濂講析講畢因曰漢武溺方技繆悠之學改文景恭儉之風民力旣敝然後嚴刑督之人主誠以禮義治心則邪說不入以學校治民則禍亂不興刑罰非所先也問三代曆數及封疆廣狹旣備陳之復曰三代治天下以仁義故多歷年所又問三代以上所讀何

書對曰上古載籍未立人不專講誦君人者兼治教之責率以躬行則衆自化嘗奉制詠鷹令七舉足卽成有自古戒禽荒之言帝忻然曰卿可謂善陳矣濂之隨事納忠皆此類也六年擢侍講學士同修國史兼贊善大夫欲使參大政辭曰臣少無他長待罪禁近足矣帝益重之濂性誠謹官內庭久未嘗許人過所居室署曰溫樹客問禁中語卽指示之嘗與客飲帝密使人偵視翼日問濂昨飲酒否坐客爲誰饌何物濂具以實對帝笑曰誠然卿不朕欺間召問羣臣臧否惟舉其善者曰善者與臣友臣知之其不善者不能知也主事茹太素上書萬餘言帝怒問廷臣或指其書曰此不敬此誹謗非法問濂對曰彼盡忠於陛下耳陛下方開言路惡可深罪

既而帝覽其書有足採者悉召廷臣詰責因字呼濂曰微景濂幾悞罪言者於是帝廷譽之曰朕聞太上為聖其次為賢其次為君子宋景濂事朕十九年未嘗有一言之偽誚一人之短始終無二非止君子抑可謂賢矣每燕見必設坐命茶每旦必令侍膳往復咨詢常夜分乃罷濂不能飲帝嘗強之至三觴行不成步帝大懽樂御製楚詞一章命詞臣賦醉學士詩又嘗調甘露於湯手酌以飲濂曰此能愈疾延年願與卿共之又詔太子賜濂良馬復為製白馬歌一章亦命侍臣和焉其寵待如此九年進學士承旨典國史制誥如故其明年致仕賜綺帛問濂年幾何曰六十有八帝乃曰藏此綺三十二年作百歲衣可也濂頓首謝又明年來朝十三年以長

孫愼獲罪帝欲置濂死皇后太子力救乃安置茂州濂狀貌豐偉美鬚髯視近而明一黍上能作數字自少至老未嘗一日去書卷於學無所不通為文醇深演迤與古作者並在朝郊社宗廟山川百神之典朝會宴享律曆衣冠之製四裔貢賦賞勞之儀旁及元勛巨卿碑記刻石之辭天子咸以委濂屢推為開國文臣之首士大夫造門乞文者後先相踵外國貢使亦知其名數問宋先生起居無恙否高麗安南日本至出兼金購文集四方學者悉稱為太史公不以姓氏雖白首侍從其勲業爵位不逮基而一代禮樂制作濂所裁定者居多其明年卒於夔年七十二知事葉以從葬之蓮花山下既蜀獻王慕濂名復移塋華陽城東弘治九年四川巡撫馬俊

奏濂真儒翊運述作可師黼黻多功輔導著蹟久死遠戍幽壤沉淪乞加卹錄下禮部議復其官春秋祭葬所正德中追諡文憲仲子璲最知名字仲珩善詩尤工書法洪武九年以濂故召爲中書舍人其兄子慎亦爲儀禮司序班帝數試璲與慎并教誡之笑語濂曰卿爲朕教太子諸王朕亦教卿子孫矣濂行步艱帝必命璲慎扶掖之祖孫父子其官內庭衆以爲榮慎坐胡惟庸黨璲亦連坐並死家屬悉徙茂州建文帝卽位追念濂興宗舊學召璲子懌復官翰林而濂門人樓璉鄭楷亦次第擢用璉自有傳永樂十年濂孫坐姦黨鄭智外親詔特宥之

葉琛字景淵麗水人博學有才藻元末從石抹宜孫守處州

爲畫策捕誅山寇葉賢三等授行省元帥王師下處琛避走建寧以薦徵至金陵授營田司僉事尋遷洪都知府佐鄧愈鍾守祝宗康泰叛愈脫走琛被執不屈大罵死之追封南陽郡侯塑像耿再成祠後祀功臣廟福王時追諡貞肅章溢字三益龍泉人其先自五代迄宋多顯者溢始生聲如鐘其家怪之幾不舉弱冠與胡深同師王毅毅字叔剛許謙門人也教授鄉里講解經義聞者多感悟溢從之游因志聖賢學天性孝友嘗遊金華元憲使禿堅不花與語悅之改官秦中要與俱行至虎林溢心動辭歸歸八日而父歿未葬火焚其廬搏顙籲天火至柩所而滅斬黃寇犯龍泉執溢從子存仁溢挺身告賊曰吾兄止一子寧我代賊素聞溢名大喜

就問計溢厲聲責之賊怒縛之柱礪刃其脇欲降之溢不爲屈至夜給守者脫歸集里民爲兵不旬日擊破賊俄府官以兵來欲盡誅註誤者溢走說石抹宜孫曰貧民迫凍餒誅之何爲宜孫然其言檄止兵留溢幕下從平慶元浦城盜授龍泉主簿不受歸宜孫守台州爲賊所圍溢以鄉兵赴援却賊已而賊陷龍泉監縣寶忽丁遁去溢與其師毅率壯士破賊復其城寶忽丁慚謀殺溢溢方參贊帥府事實忽丁乃殺毅以反溢率兵擊走之因平松陽寇又與胡深破賊麗水又擊長槍軍於婺論功累授浙東都元帥溢曰吾所將皆鄉里子弟肝腦塗地而吾獨取功名弗忍爲也辭不受退隱匡山明兵克處州避入閩太祖以幣聘之乃與劉基宋濂葉琛偕至

太祖勞基等曰我爲天下屈四先生今天下紛紛何時定乎溢對曰天道無常惟德是輔惟不嗜殺人者能一之耳太祖偉其言授僉營田司事巡行江東兩淮田畝分籍定稅民甚便之以病久在告太祖知其念母也厚賜遣歸省而留其子存厚於京師浙東設提刑按察司命溢爲僉事胡深出師溫州令溢守處州饋餉供億民不知勞荆楚平遷湖廣按察僉事時荆襄多廢地議分兵屯田以控北方太祖善之會浙東按察使宋思顏孔克仁等以職事被逮詞連溢太祖遣太史令劉基諭溢曰素知溢守法毋恐深入閩陷沒處州動搖命溢爲浙東按察副使往鎮之溢辭副使仍爲僉事既至宣布詔旨誅首叛者餘黨悉定賊寇慶元龍泉官軍盡戍浦城城

中兵少。溢召舊部義兵使據要害，列木柵爲屯，相聯絡，賊不敢犯。浦城戍卒乏食，李文忠欲運處州糧餉之。溢以爲舟車不通，而軍中所掠糧多，請入官均給之。温州茗洋周遂卿屢爲寇，溢命子存道督兵擒斬。處多山，而少田，軍需不足。胡深奏免雜賦，行省復有所科。溢奏罷之。朱亮祖取温州，軍中頗掠子女。溢命鎮撫林璠徵之，各部盡還其家。初，溢請朝京師，太祖報曰：「俟平吳，卽召卿。」至是，召溢入朝，而詔存道守處。太祖諭羣臣曰：「溢雖儒臣，父子宣力一方，寇盜盡平，功不在諸將。後復問溢征閩，諸將何如？」對曰：「湯和由海道進，胡美自江西入，必勝。然閩中尤服李文忠威信。若令文忠從浦城取建寧，此萬全計也。」太祖立詔，文忠出師。如溢策，處州糧舊額一

萬三千石，有奇。軍興，加至十倍。溢言丞相奏之，詔從其舊。浙東造海船，徵巨材於處。溢曰：「處婺之交，山巖峻險，縱有木道，何從出？」白行省罷之。洪武元年，與劉基並拜御史中丞，兼贊善大夫。時廷臣伺帝意多苛，溢獨務大體，或以爲言。溢曰：「憲臺百司儀表，當養人廉恥，使避不犯，豈直恃搏擊爲能哉？」帝親祀社稷，會大風雨，還坐外朝，怒儀曹議禮不合，致天變。溢請寬貸，帝乃貰之。存道從文忠入閩，閩平，詔存道以所部兵從海道北征。溢持不可，曰：「許以事平歸農，今復調之，是不信也。」帝不懌，而罷繼而奏曰：「兵已入閩，者俾還州里，昔嘗叛逆之民，宜籍爲軍使，北征一舉而恩威著矣。」帝喜曰：「孰謂儒者迂濶哉！」然非先生一行，無能成茲事者。溢受詔卽行，至處州。

遭母喪乞守制不許而遣存厚還家溢灑泣治事鄉兵既集命存道由永嘉浮海北再上章乞終制詔可溢悲戚過度營葬親負土石感疾卒帝痛悼親撰文卽其家祭之福王時追贈太保諡莊敏子存道存誠存厚

存道溢長子也溢隱匡山以所集義兵屬存道曰難將及矣汝曹善保障州里存道撫其衆遂成練卒後率所部歸總管孫炎炎令守上游陳友定兵來侵屢擊却之以功授處州翼元帥副使戍浦城總制胡深戰歿命代領其衆為遊擊溢卽處城坐鐘之溢謂父子相統於律不宜奏罷存道官不允旋分兵征八閩而詔存道守處復部鄉兵一萬五千人從李文忠入閩閩平率所部浮海至京師帝褒諭之命從馮宗異北

伐以功授處州衛指揮副使洪武三年從徐達征秦隴取興元留存道守之明昇將吳友仁來侵存道擊敗其衆再守平陽轉左衛指揮同知已從湯和北伐守哈墩不刺營五年從和征陽和遇敵於斷頭山力戰死之

明史彙

列傳第十八終

敬慎堂

明史彙

七

味五... 禮雲山人集 列傳十八

明史藁

列傳第十九

光祿大夫

經筵講官明史總裁戶部尚書加七級臣王鴻緒奉

敕編撰

陶安

李晉

詹同

子徽

朱升

崔亮

錢用壬

牛諒

答祿與權

魏觀

陶凱

曾魯

任昂

李原名

陶安字主敬當塗人少敏悟有大志博涉經史從耆儒李習游元至正初舉江浙鄉試授明道書院山長避亂家居太祖取太平安與習率父老出迎安謂習曰龍姿鳳質非常人也吾輩今有主矣太祖召與語安進曰海內鼎沸豪傑並爭率

攻城屠邑掠子女玉帛非有撥亂救民安天下心明公渡江神武不殺人心悅服應天順人以行弔伐天下不足平也太祖曰善吾欲取金陵何如安曰金陵古帝王都取而有之撫形勝以臨四方何向不克太祖又曰善留參幕府授左司員外郎授習太平知府習字伯羽年八十餘矣卒於官安從克集慶進郎中太祖得劉基宋濂章溢葉琛問安四人者何如對曰臣謀畧不如基學問不如濂治民之才不如溢琛太祖多其能讓後克黃州思得重臣鎮之曰無逾安者遂命知黃州寬租省徭民以樂業坐事謫知桐城起知饒州陳友定兵攻城督吏人拒守援兵至敗去諸將欲盡屠從寇者安曰民爲所脅奈何殺之不許太祖嘉安功賜詩褒美州民建生祠

事之吳元年初置翰林院首召安爲學士時徵四方宿儒議禮命安爲總裁官與省臣條上郊社宗廟議帝悉從之已又爲議律官與李善長劉基周禎滕毅等刪定律令洪武元年命知制誥兼修國史帝御東閣安與章溢等侍命安論前代興亡本末安言喪亂之原由於驕侈帝曰居高位者易驕處佚樂者易侈驕則善言不入而過不聞侈則善道不立而行不顧如此者未有不亡卿言當又嘗論學術安曰道不明邪說害之也帝曰邪說害道猶美味之悅口美色之眩目邪說不去則正道不興天下何從治安頓首曰陛下所言可謂深探其本矣安事帝十餘歲視諸儒最舊及官侍從寵愈渥御製門帖子以賜時人榮之御史或言安隱過帝詰曰安寧有

此且若何從知曰聞之道路帝大怒立黜之中書省臣進曰御史職當言言卽有失宜寬假帝卒不聽既又命安爲江西行省參知政事諭曰朕渡江初卿首謁軍門敷陳王道及參幕府裨益良多繼入翰林益聞讜論江西上游地撫綏莫如卿安辭帝不許至江西政績益著其年卒於官疾劇草上時務十二事帝親爲文以祭追封姑孰郡公安所學尤長於易筮驗若神方明初之議諸禮也宋濂以外艱家居其儀率安裁定大祀禮專用安議禘禮用詹同齋戒禮朱升五祀禮崔亮朝會禮劉基祝祭禮魏觀軍禮陶凱後復有改易語在禮樂志安子晟洪武中爲浙江按察使貪賄不檢下帝怒并其兄昱誅之發家屬四十餘人爲軍後死亡且盡所司復至

晟家勾補安繼妻陳詣闕訴帝念安功除其籍安前妻喻名德常有賢行王師克集慶安移家就之喻邀母同行母不可喻曰四海兵爭惟高城深池都會之地可以托身母從之陳友諒陷姑孰母以移居免人服其先見云福王時追諡安文憲

詹同字同文初名書婺源人四世祖青從宋高宗南渡官殿前統制後脫尺籍齒編氓曰吾子孫當有以文學興者同幼穎異受易於甘楚材春秋於劉彭壽二人皆元季名士學由此大進學士虞集見之曰才子也以其弟槃子妻之至正中與茂才異等除郴州學正遇亂家黃州仕陳友諒爲翰林學士承旨兼御史太祖下武昌召爲國子博士易名同時功臣

子弟教習內府諸博士治一經不盡通同淹貫羣籍講易春秋最善應教爲文才思泉湧太祖善之遷考功郎中直起居注諭曰史貴直筆唐太宗命直書建成事以公天下予言行汝當直書俾後世徵實同再拜受旨洪武元年與侍御史文原吉起居注魏觀等循行天下訪求賢才還進翰林直學士稍遷侍讀學士帝御下峻御史中丞劉基曰古者公卿有罪禮水加劔詣請室自裁所以勵廉耻存國體也同侍側取戴記及賈誼疏以進因剴切言之帝嘗謂同聲色之害甚於鳩毒前代率以此敗亡創業垂統之君爲子孫所承式尤不可不謹同因舉成湯不邇聲色垂裕後昆以對其納誨多類此四年進吏部尚書六年爲學士承旨兼吏部尚書同雖任吏

部國家文章制作之事仍屬裁定爲承旨復與學士樂韶鳳定釋奠先師樂章又上言陛下渡江已來征討平定之蹟禮樂治道之詳雖有紀載尚未成書乞編日曆以傳後世帝從之命同與宋濂爲總裁官吳伯宗等爲纂修官逾年大明日曆成自起兵臨濠至洪武六年征伐次第禮樂刑政羣臣功過四夷朝貢之類共一百卷藏之金匱副在祕書監同等又言日曆祕天府人不得見請仿唐貞觀政要分輯聖政宣示天下帝從之同等乃分四十類自敬天至制蠻夷凡五卷名曰皇明寶訓嗣後凡有政蹟史官日記錄之隨類增入焉七年賜勅致仕語極褒美後復起承旨卒同以文章結主知應制占對靡弗敏贍帝嘗言文章宜明白顯易通道術達時務

無取浮薄同所爲多稱旨而操行特耿介故至老眷注不衰
福王時追贈禮部左侍郎謚文憲子徽字資善洪武十五年
舉秀才會復置都察院設監察都御史八人以徽及李原名
趙仁等爲之明年改試左僉都御史又明年超拜左都御史
久之命兼吏部尚書居二年實授尚書兼左都御史皇太孫
立以太子少保兼尚書徽有才智剛決不可犯勤於治事爲
帝所獎任然性險刻李善長才疏力薄後坐藍玉獄語
連徽及子尚寶丞紱並誅死同從孫名原爲中書舍人善大
書宮殿城門題額往往皆希原書也

朱升字允升休寧人少師同里陳櫟復往學於九江黃澤歸
讀書紫陽祠中舉元鄉薦爲池州學正講授有法學者雲集
會蕲黃盜起退隱石門覃思著書數避兵遁竄卒未嘗一日
廢太祖下徽州以邵愈薦召問時務升對曰高築牆廣積糧
緩稱王太祖善之遂參密議典禮章程悉預裁畫吳元年授
侍講學士知制誥同修國史以年老特免朝謁尋進學士洪
武元年定宗廟時享之禮尋命與諸儒修女誠采古賢后妃
事可法者編上之封爵諸功臣制詞多升撰時稱其典核踰
年請老歸卒年七十二升自幼力學至老不倦尤邃經學嘗
曰先儒作傳注求以明經也俗學皆雜誦經注使經文斷裂
旨趣不融乃作諸經旁注離觀則逐字爲訓合誦則條達咸
章辭約義精學者稱楓林先生子同官禮部侍郎坐事死
崔亮字宗明藁城人元浙江行省掾明師至舊館亮降授中

書省禮曹主事遷濟南知府以母憂歸洪武元年禮部尚書錢用壬舉行郊廟社稷釋奠精田諸典禮又議定乘輿以下冠服制度其冬請告去乃起復亮代之亮居禮曹時卽位大祀諸禮皆其所條畫丞相善長上之朝由是知名及爲尚書國家一切禮制亮援引故實以定其議考證詳確逾於用壬帝用亮議上淳祖陵名曰英陵亮復請行祭告禮太常博士孫吾與駁之言山陵之制莫備於漢人主卽位之明年將作卽營陵地如文帝起霸陵時尚在尊位豈有陵號祭告之禮又唐太宗昭陵之號定於葬長孫皇后時武后合葬乾陵其號定於高宗初葬之日時帝后陵初未有兩號亦決無祭告之禮亮曰加上陵號尊歸先世漢光武加先陵曰昌宋太祖

加高祖陵曰欽曾祖陵曰康祖陵曰定考陵曰安蓋創業之君尊其祖考則亦尊崇其陵旣尊其陵自必以告禮緣人情加先帝陵號而不以告非人情也廷議皆是亮乃緝吾與議頃之亮言禮運曰禮行於郊則百神受職沈括援唐志云凡有事上帝則百神皆預今宜增天下神祇壇於園丘之東方澤之西其神主題曰天下神祇詔從之帝嘗謂亮先賢有言見其生不忍見其死聞其聲不忍食其肉今祭祀省牲於神壇甚邇心殊未安亮乃奏考古省牲之儀遠神壇二百步帝大喜亮復奏大祀之牲上宜躬省中祀小祀請依舊典令禮官省牲帝曰朕齋戒事神豈敢憚勞於是凡親祀帝皆躬省亮又奏定大祀前七日陪祀官詣中書省受誓戒戒辭如唐

禮帝虞社郊諸祭壇而不屋或驟雨沾服亮奏引朱祥符九年南郊遇雨於太尉廳望祭及元經世大典壇垣內外建屋避風雨之文乃詔有司建殿於壇南遇雨則望祭亮因奏靈星壽星司中司命司民司祿諸神卽周禮幽崇之祭也漢嘗立靈星祠祀之唐宋壇而不屋今諸壇旣爲殿屋靈星諸祠亦爲殿望祀之便乃詔准漢制建壇屋於城南亮又奏郊特牲器用陶匏周禮籩人凡祭祀供簠簋之實疏曰外祀用瓦簠今祭祀用磁已合古意而盤盂之屬與古簠簋祭豆異皆宜易以磁惟籩以竹詔從之又奏依周禮詳定五祀之制帝旣允羣臣請配仁祖南北郊亮因言先時郊祀以未舉配天禮故禮成復詣太廟恭謝今宜罷不用惟先祭三日詣太廟

以配享告詔可帝以日中有黑子疑祭天不順所致欲增郊壇從祀之神亮執奏漢唐煩瀆宜止祀日月星辰太歲乃止亮又奏四時薦新及裸禮圭瓚鬱鬯之制又言旂纛每月朔望致祭禮煩而瀆請止行於當祭之月皆從之帝一日問亮曰朕郊祀天地拜位正中而百官朝參則班列東西何也亮對曰天子祭天升自午陛祭社升自子陛社祭土而主陰陰北方也故君南向蒼陰之義也郊祭天而主陽陽南方也故君北向以蒼陽也若羣臣朝參非蒼神之義當避君上之尊故升降則皆由卯陛朝班則分列東西以避馳道其義不同亮倉卒占對必傳經義多此類也自郊廟祭祀外朝賀山呼百司箋奏官員親屬冠服殿上坐墩之制及大射軍禮皆亮

所酌定亮嘗言凡祥瑞應見皆國之休禎請依唐令若麟鳳龜龍依圖書合大瑞者所司表奏餘鳥獸草木之類驗實圖進帝曰卿等止議祥瑞非也夫災異之來上天垂誠綦重四方或有變徵無論大小其令所司馳奏焉三年九月亮卒官其後爲禮部者牛諒張籌朱夢炎劉仲質之屬亦各有所論建與用壬皆附著於篇

錢用壬字成夫廣德人元南榜進士第一授翰林院編修出使張士誠留爲行省左右司郎中參張士信軍事於淮安進行省參政鎮淮徐邳三州淮揚歸附授按察司副使尋遷中書省參議吳元年改御史臺經歷預定律令洪武元年分建六部官以用壬爲禮部尚書時官制未備中書省有與諸儒臣

博議郊廟社稷諸儀其議釋奠禮曰周制凡立學者釋奠於先聖先師凡學春夏釋奠於先師秋冬亦如之漢儒以先聖爲周公孔子先師爲詩書之官禮高堂生樂制氏詩毛公書伏生之屬蓋四時之學將習其道故釋奠各以其師而不及先聖唯春秋合樂天子視學則有司統祭先聖先師魏正始中使太常釋奠於辟雍晉成穆孝武皆親釋奠隋制國子監每歲四仲月上丁釋奠先聖先師州縣則用春秋仲月唐初釋奠儒官爲祭主武德貞觀中皆以二月親幸國子監開耀景龍中皆遣皇太子開元中詔以三公攝事宋元因古禮損而益之今宜定制以春秋仲月上丁丞相初獻翰林學士亞獻國子祭酒終獻制曰可然未行也用壬爲尚書之秋始舉

其禮凡禮儀祭祀宴享貢舉諸政皆專屬禮官冬十一月帝欲行耜田禮諭廷臣曰后稷樹藝稼穡而生民之詩作成王播厥百穀而噫嘻之頌興欲財用之不竭國脉之常裕鬼神之常享必也務農乎遂命以明春舉耜田禮於是用壬等引祭法周官之文及漢晉北齊隋唐宋故事以定其議制從之語詳禮志又詔禮官及儒臣議定乘輿以下冠服之制事具輿服志時儒生多習古義而用壬考證尤詳確然其後諸典禮多有更定云是冬用壬請告賜以錢令挈妻子居湖州牛諒字士良東平人洪武元年舉秀才爲典簿與張以寧使安南安南王卒以寧留洱江使諒入其國宣諭威德使還稱旨擢工部員外郎進本部侍郎六年拜禮部尚書定釋奠禮

及大祀分獻禮與簪同等議省牲冠服御史答祿與權請祀三皇帝下其議禮官併命考歷代帝王有功德者廟祀之諒奏三皇立廟京師春秋致祭伏羲配以勾芒神農配以祝融黃帝配以風后力牧漢高祖光武唐高祖太宗宋太祖元世祖各就其陵立廟商中宗高宗周成王康王漢文帝武帝宣帝明帝章帝唐元宗憲宗後唐明宗周世宗宋太宗真宗仁宗亦就陵立廟帝命五帝三王及漢唐宋創業之君俱立廟京師其守成賢君就陵立廟皆每歲春秋祭之諒尋降主事復擢爲本部尚書卒以不任職罷諒著述甚多爲世傳誦蓋國初才士也

與權字道夫其先蠻部人有別號答祿者子孫因以爲氏四

世祖始仕元爲萬戶與權舉至正初進士由祕書監管勾歷
河南北道廉訪使僉事入明寓河南永寧博學強記以元故
官召洪武六年用薦授秦府紀善改御史請重刊律令憲綱
頒之諸司盱眙民進瑞麥與權請薦宗廟帝曰以瑞麥爲朕
德所致朕菲薄不敢當其必歸之祖宗御史言是也已請祀
三皇畧曰伏羲神農黃帝號稱三皇盛德大業被於萬世堯
舜禹湯文武承其道爲統孔子顏曾思孟傳其道爲學統以
續其業學以傳其心三皇繼天立極爲萬世宗今社稷宗廟
山川之神皆得享祭三皇獨闕非所以崇德報功也帝遂下
禮官議行之并建帝王廟且遣使者巡視歷代諸陵寢設守
陵戶二人三年一祭其制度皆自此始出爲廣西僉事未之

任復留爲御史又請行禘禮事下禮部太常寺翰林院議格
不行未幾擢翰林修撰坐事降典籍進應奉以年老賜致仕
禘禮至嘉靖中始定焉

張籌字惟中無錫人父翼峭直任氣張士誠旣禽其將莫天
祐守無錫不下翼率父老爭之天祐意沮復繩城謁平章胡
美請勿僇降人美大喜許諾城中人得完籌舉元江浙省試
第一洪武四年尚書詹同薦授翰林應奉改禮部主事奉詔
與尚書陶凱編集漢唐以來藩王事蹟爲昭鑑錄擢湖廣行
省參政九年召爲禮部尚書命與學士宋濂定諸王妃喪服
之制籌有文學記誦淹博又在禮曹久歷代禮文沿革俱諳
曉然頗善附會帝初命陶安等定園丘方澤宗廟社稷諸儀

行數年矣既而欲有所更定籌乃請合社稷爲一壇罷勾龍
棄配位奉仁祖淳皇帝配饗大社大稷以明祖社尊而親之
之道帝大悅命有司改築籌又言社稷與天地宗廟宜並崇
敬國初誤列中祀今既奉淳皇帝配其禮嚴重宜爲上祀奏
可籌驟更祀典最當帝心通儒竊非之十年坐事罰輸作十
二年起本部員外郎其秋復尚書任尋以事免

朱夢炎字仲雅進賢人元至正進士爲金谿丞以博洽聞太
祖召居賓館命與熊鼎集古事爲質直語教公卿子弟名曰
公子書除國子博士奏對詳雅文章有根據帝益重之遷翰
林編修坐累謫官起爲禮部員外郎進侍郎洪武十一年拜
尚書帝方稽古右文夢炎援古証今剖析源流如指諸掌朝

論咸服未幾卒於官

劉仲質字文質分宜人洪武初爲宜春縣訓導被薦入京奏
對稱旨擢翰林典籍奉命校正春秋本末十五年拜禮部尚
書帝以天下郡縣並建孔子廟而祀止京師典禮未備命仲
質議之仲質乃與儒臣奏定釋奠禮儀頒行天下學校每歲
春秋仲月通祀孔子如儀時國子學新成帝將行釋菜侍臣
有言孔子雖聖人臣也禮宜一奠再拜帝曰孔子明道德以
教後世其可以職位論耶昔周太祖如孔子廟將拜左右曰
孔子陪臣不宜拜周太祖曰孔子百世帝王之師何敢不拜
遂再拜今朕有天下敬禮百神於先師禮宜加尊崇乃命仲
質詳議仲質請帝服皮弁執圭詣先師位前再拜獻爵又再

拜退易服乃詣彝倫堂命講庶典禮隆重稱陛下之意詔曰
可又立學規十二條合欽定九條頒賜師生又奉命頒劉向
說苑新序於天下學校令生員講讀是年冬改華蓋殿大學
士帝親製誥文賜之坐事貶御史後以年老致仕仲質爲人
厚重篤實博通經史文體典確不尚浮藻常當帝意焉

魏觀字杞山蒲圻人元季隱居蒲山太祖下武昌聘授平江
州學正遷國子助教再遷浙江按察司僉事兩淮都轉運使
入爲起居注命偕吳琳以幣帛求遺賢於四方洪武元年建
大本堂命侍太子說書及授諸王經未幾又命偕文原吉詹
同吳輔趙壽等分行天下訪求遺才所舉多擢用轉太常卿
攷訂諸祀典稱旨改侍讀學士尋遷祭酒四年遷試與博士

孫吾與修撰王傑爲讀卷官得吳伯宗等坐考祀孔子禮不
以時奏謫知龍南縣未至召爲禮部主事五年廷臣薦觀才
出知蘇州府兵燹後民力凋敝前守陳寧苛刻人呼陳烙鐵
觀盡改寧所爲建黉舍聘周南老王行徐用誠與教授貢穎
之定儀節王彝高啟張羽輩訂經史徵耆耄周壽誼楊茂林
文友行鄉飲酒禮課績爲天下最擢四川行省參知政事以
部民乞留命還蘇蘇舊治張士誠踞以爲官遷於都水行司
觀以其地湫隘還治舊基又浚錦帆涇興水利或譖觀興旣
滅之基帝怒使御史張度廉其事以聞遂被誅尋悔之命致
祭歸葬太子諸王賻觀有加

陶凱字中立臨海人博學善屬文尤工詩領至正鄉薦除永

豐教諭不就歸洪武初以薦徵入同修元史書成授翰林應奉教習大本堂授楚王經三年七月擢禮部尚書與崔亮等雜采周官儀禮及漢唐宋制酌定諸禮儀以聞帝輒報可凱與亮同爲尚書各有敷奏若品官墳塋之制從凱言也初舉制科命凱定科舉式頒於天下明年會試以凱爲主考帝親策士命凱與楊訓文充提調官取進士吳伯宗等百二十人得人之盛自此始其程文進御前凱序其首簡後遂爲定例帝嘗諭凱曰事死如事生朕祖考升遐久不逮事生宜盡所以追遠之道凱以太廟已有常祀乃請於乾清宮之左別建奉先殿以奉神御從之帝以前代樂章多諛辭或未雅馴命凱與詹同等更製宴饗九奏樂章以進甚稱旨長至日侍帝

齋宮凱言皇帝升中於天國之大典羣臣宜有篇什以紀慶成遂命凱首唱諸臣俱和學士宋濂爲之序其後從駕巡行陪祀太學有所奏帝未嘗不稱善詔令封冊歌頌碑碣時時命凱屬草凱復言漢唐宋時皆有會要紀載時政今起居注雖設其諸司所領諭旨及奏事簿籍宜依會要編類爲書庶可以垂法後世下臺省府者宜各置銅櫃藏之以備稽考俾無遺闕帝俱從之五年旬容民獻嘉瓜同蒂者二帝御武樓中書省臣率百官以進凱奏旬容陛下祖鄉也聖德和同國家協慶故禎祥獨見於此帝曰草木之瑞比比而有卿歸德於朕朕何德以堪之賜其民錢遣之去凱尋出爲湖廣參政召還國子祭酒復以晉王府右相致仕凱嘗自號耐久道人

帝聞而惡之其在禮部時朝使往高麗主客誤用符驗後追坐論死

曾魯字得之新淦人年七歲能暗誦五經一字不遺奉禮郎簡正理欲以神童舉於朝其父不聽稍長日取三史記之尋及其餘凡數千年國體人才制度沿革無不能言者遂以文學聞於時元至正中魯率里中豪集少壯保鄉井數具牛酒爲開陳順逆衆無敢爲非義者人號其里曰君子鄉洪武初召魯爲纂修元史總裁官謨葺功最多史成賜金帛以魯居首乞還山會開局編類禮書復留魯時議禮者益起魯衆中揚言曰某禮宜據某說則是從某說則非有辨詰者必歷舉傳記以告尋授禮部主事開平王常遇春薨高麗王遣使來

祭魯欲觀其文使者靳不與魯固欲觀使者不得已出之外襲金龍黃帕文不署洪武年號魯讓曰龍帕誤耳納貢稱藩而不奉正朔君臣義安在使者謝過命易去乃已安南陳叔明篡其主日煜位懼討遣使入貢以覘朝廷意主客曹已受其表魯取副封視之白尚書詰使者曰前王日煜今何驟更名使者不敢諱具言其實帝曰島夷乃狡獪如此耶卻其貢不受由是器重魯嘗問丞相魯今何官對曰主事耳即日超六階拜中順大夫禮部侍郎魯以順字犯其父諱辭就朝請下階吏部持典制不之許帝將歸倭人俘命儒臣草詔閱魯藁大悅曰頃陶凱文已起人意魯復如此文運其昌乎未幾命主京畿鄉試甘露降鍾山羣臣爭以詩應制魯獨進賦帝

命侍臣取諸作更番誦之獨歎魯文整核是冬引疾歸未抵家卒淳安徐尊生嘗曰南京有博學士二人以舌爲筆者曾得之以筆爲舌者宋景濂也魯屬文不留藁其徒間有所輯錄亦未成書云洪武中禮部侍郎二十餘人其知名者自劉崧曾魯外有崇明秦約山陰陳思道萬安張衡約字文仲博學工辭章洪武初舉文學之士召試慎獨箴約文第一立擢禮部侍郎尋母老乞歸久之復徵入朝陳三事皆切直仍乞歸卒思道字執中洪武十八年進士授刑部主事帝賞其執法超拜兵部右侍郎益勵風節人莫敢干以私改禮部左侍郎三疏乞歸居家不殖生產守令造門不得見衡亦十八年進士授禮科給事中奏疏剴切擢禮部右侍郎轉左以清慎

見褒載於大誥後以言事忤旨死

任昂字伯顯河陰人早有文譽元末舉進士除知寧晉縣不赴隱居以經史自娛洪武初薦起爲襄垣訓導擢御史十五年拜禮部尚書帝加意太學罷祭酒李敬吳顥命昂增定監規八條遂以大學士宋訥曹國公李文忠兼領國子監事會司諫關賢上言國家崇尚經術選士於鄉邇來郡邑所司非人師道不立教養旣無成法選舉歲至缺員甚至俊秀生員黥充承差乖朝廷育賢之意昂乃奏定天下歲貢士從翰林院考試定其高下以爲殿最明年命科舉與薦舉並行昂條上科場成式視前加詳取士之制始定廣東都指揮狄崇王臻爲次妻乞封下廷臣議昂議曰禮莫大於分分莫大於名

妾不可爲嫡魯莊公妾成風僖公母也稱爲夫人春秋非之
哀公庶子荆之母嬖將立爲夫人使宗人躄夏獻其禮對曰
無之古者夫人歿貴妾攝內事不得稱夫人爲庶子而貴推
恩其母亦不得稱夫人以並嫡也崇臻所奏非禮不可許從
之遂命昂及翰林院定嫡妾封贈例因詔同吏部定文官封
贈例十一廕叙例五頒示中外又請更定冕服之制序朝參
坐次議上皆從之昂奏毀天下淫祠其合祀典者宜正其稱
號蜀祀秦守李冰宜以漢守文翁宋守張詠同祀密縣祀太
傅卓茂鈞州祀丞相黃霸彭澤祀丞相狄仁傑皆遺愛在民
李龍遷於隆州謝夷甫於福州皆爲民捍患吳丞相陸遜以
勞定國其祀在吳宜以子抗從子凱配元總管李黼立祠江

州元帥余闕立廟安慶從闕守皖全家殉義者有萬戶李宗
可宜配享闕廟皆從之明年命以鄉飲酒禮頒行天下復令
制大成樂器分頒天下儒學是時以八事考課外吏及次第
雲南功賞事不隸禮部帝皆令昂主其議本年署吏部事予
告歸

李原名字資善一稱彥名安州人洪武十五年以通經儒士
舉爲御史二十年使平緬歸言思倫發懷詐窺伺且言靖江
王以大理印行令旨非法爲遠人所輕金齒衛指揮李觀處
事實厚蠻中愛服帝馳諭西平侯英等嚴備邊勅獎觀而擢
原名爲禮部尚書是歲北清朔漠南收羅甸四夷震讐朝貢
之使不絕帝旣用原名策平定麓川緬甸諸蠻凡遠方之事

悉以谷之高麗王奏遼東文高和定州皆其國舊壤乞就鐵嶺屯戍原名言數州舊為元所統皆屬於遼高麗地以鴨綠江為界今鐵嶺已置衛不宜復有陳請帝命諭其國守分土無生釁王昌權國事數遣使請入朝帝謂原名高麗廢立自由三綱已斃數請入朝必有隱謀不可許原名請勅遼東守臣無納高麗王歲時但令陪臣奏事安南國歲貢方物帝念其勞民原名以帝意諭之令三年一貢自是為定制以帝命行養老之政申明府州縣歲貢多寡之數定官民巾服之式皆著為令建歷代帝王廟原名請以風后力牧等三十六人從祀帝去趙普安童阿朮而增入陳平馮異潘美本華黎餘悉如原名奏魯王薨定喪服之制進士王希曾請喪出母原

名以其非禮請著為禁凡郊祀宗廟社稷嶽瀆諸制先後諸儒臣論定時有詳畧帝悉令原名更正之諸禮臣惟原名在任久二十三年以老致仕

明史彙

列傳第十九終

黃真乃人集 史彙

七

敬慎堂

卷之二十三 中 以失姪止

論百餘家亦精於醫術悉令與各更立之籍斷其對與各其

明史藁

列傳第二十

光祿大夫

經筵講官明史總裁戶部尚書加七級臣王鴻緒奉

敕編撰

樂韶鳳

劉三吾

宋善

汪叡

吳伯宗

吳沈

鮑恂

全思誠

危素

張以寧

秦裕伯

安然

王本等

許存仁

朱訥

趙倣

錢宰 張美和

桂彥良

陳南賓

葉岐

董子莊

孔希學

樂韶鳳字舜儀全椒人博學能文章謁太祖於和陽從渡江
參軍事從下集慶授江南行省管勾洪武三年授起居注歷

給事中中書左司員外郎兵部侍郎六年拜尙書與中書省御史臺都督府定教練軍士法改侍講學士與承旨詹同釐正釋奠先師樂章編集大明日曆七年帝以祭祀駕還應用樂舞前導命韶鳳等撰樂章因撰神降祥神貺惠酣酒色荒禽荒諸曲以進凡三十九章曰回鑾樂歌皆寓規諫禮部具樂舞圖以上命太常肄習之帝以舊韻出江左多失正者命與諸廷臣參考中原雅音正之書成名洪武正韻又命考陵寢朔望祭祀禮及登壇脫舄禮詳稽故實裒定其儀帝俱從之尋病免未幾起國子司業遷祭酒奉詔定皇太子與諸王往復書劄禮考據精詳屢被褒答十三年致仕歸以壽終第暉禮毅皆知名暉開封知府禮太常卿毅諸暨同知

劉三吾茶陵人也初名崑後名如孫字三吾以字行兄耕孫壽孫皆仕元耕孫寧國路推官長槍賊陷寧國死焉壽孫常寧州學正武岡洞獠寇常寧亦死之三吾避兵廣西行省承旨授靖江教授遷儒學副提舉明兵下廣西乃歸茶陵洪武十八年以茹瑺薦召至年七十三矣奏對稱旨授左贊善累遷翰林學士時天下初平典章闕畧帝銳意制作而宿儒凋謝得三吾晚悅之一切禮制及三場取士法多所刊定三吾博學善屬文帝製大誥命三吾序洪範注成亦命序敕修省躬錄書傳會選寰宇通志禮制集要諸書皆總其事書成賜賚甚厚帝嘗曰朕觀天象奎壁間嘗有黑氣今消矣文運其興乎卿等宜有所述作以稱朕意於是帝製詩時令屬和嘗

賜以朝鮮玳瑁筆朝參命列侍衛前燕享賜坐殿中與汪叡
朱善稱三老而禮遇尤重二十三年授晉世子經吏部劾其
怠職降國子博士未幾復學士皇太子薨帝御東閣門召群
臣曰朕老矣太子不幸至此古云國有長君社稷之福燕王
英武似朕立之何如三吾進曰皇孫年富世適之子子歿孫
承適統禮也卽立燕王置秦晉二王何地帝不答大哭而罷
皇太孫之立三吾有力焉三吾爲人慷慨不設城府自號坦
坦翁至臨大節屹乎不可奪戶部尙書趙勉者三吾壻也坐
賊死三吾引退許之未幾又復學士三十年偕紀善自信蹈
等主考會試榜發泰和宋琮第一北士無預者琮善易學登
第官檢討悵然語人曰翰苑當有厄吾其竄乎旣而諸生上

言三吾等南人私其鄉帝怒命侍講張信等覆閱不稱旨有
言信等故以陋卷呈由三吾等屬之也帝益怒信蹈等論死
三吾以老戍邊琮亦遣戍帝親賜策問更試擢六十一人皆
北士時謂之南北榜又曰春夏榜云建文初三吾召還卒琮
承樂初赦還起刑部檢校鄉人楊士奇輩貴顯琮無所攀援
宣德中以檢討掌助教事卒之前預尅死期或叩以休咎不
應乃字仲魯婺源人元末與弟同集義旅保鄉邑助復饒州
授浮梁州同知不受同爲元帥守婺源胡大海克休寧叡兄
弟來附設星源翼分院於婺源以同爲院判叡歸田里庚子
秋同將兵爭鄱陽不克棄妻孥亡之浙西幕府疑之檄叡入
應天爲質已聞同爲張士誠所殺授叡安慶稅令未幾徵參

賈川蜀軍事以喘辭歸洪武十七年復召見命講西伯戡黎
篇授左春坊左司直嘗命續薰風南來詩及他應制皆稱旨
請春夏停決死罪體天地生物之仁從之踰年疾作請假歸
敕敦實簡靜不妄言笑及進講兩宮遇事輒言帝嘗以善人
呼之官安慶時入奏事楚寇陷城妻程負幼子淮竄山中度
難兩金棄之僕後至得幼子草間無恙寄乳村媪逾旬子母
復聚善字備萬豐城人九歲通經史大義能屬文元末兵亂
隱山中著詩經解顧史輯事繼母以孝聞洪武初為南昌教
授八年對廷試第一授翰林院修撰奏對失旨謫遼東教授
未至放還鄉召為翰林待詔上疏論婚姻律曰民間姑舅子
若女及兩姨子若女法不得為婚讐家詆訟或已聘見絕或

既婚復離或成婚有年兒女成行有司逼奪按舊律尊長卑
幼相與為婚者有禁若謂母之姊妹與已之身是為姑舅兩
姨不可以卑幼上匹尊屬姑舅兩姨子女無尊卑之嫌成周
時王朝所與為婚者不過齊宋陳杞稱異姓大國曰伯舅小
國曰叔舅其世為婚姻可知列國齊宋魯秦晉亦各自為甥
舅之國後世晉王謝唐崔盧潘楊之曜朱陳之好皆世為婚
媾温嶠以舅子娶姑女呂榮公夫人張氏乃待制張昱女待
制夫人卽榮公母中國夫人姊也今江浙此事尤多以致訟
獄繁興願下羣臣議弛其禁帝是之十八年擢文淵閣大學
士論說多稱旨嘗講家人卦心箴帝大悅未幾請告歸卒年
七十二卒之前有星如虹墜其舍正德中諡文恪

吳伯宗名祐以字行金谿人洪武三年庚戌鄉薦舉首明年辛亥廷對擢進士第一時開科之始得伯宗帝甚喜賜冠帶袍笏授禮部員外郎與修大明日曆胡惟庸用事欲人附已伯宗性剛直不肯相屈下惟庸銜之中傷以事謫居鳳陽伯宗上書論時政因言惟庸專恣不法不宜獨任以事久之必爲國患辭甚剴切帝得奏召還賜衣鈔奉使安南得馴象方物以獻除國子助教命進講東宮首陳正心誠意之說改翰林典籍帝製十題命賦援筆立就詞旨峻潔帝稱曰才子賜織金錦衣除太常寺丞辭改國子司業又辭忤旨貶金縣教諭至淮安召還爲翰林檢討十五年進武英殿大學士明年冬坐弟仲寔爲三河知縣薦舉不實詞連伯宗降檢討伯宗温厚詳雅不苟媵阿故屢獲譴踰年卒於官

吳沉字濬仲蘭溪人元國子博士師道子也早以學行聞太祖下婺州召沉及同郡許元葉瓚王胡翰汪仲山李公常金信徐孳童冀戴良吳履孫履張起敬會食省中曰令二人進講經史敷陳治道已命沉爲郡學訓導洪武初郡以儒士舉誤上其名曰信仲授翰林院待制沉謂修撰王釐曰名誤不更是欺罔也將白於朝釐言恐觸上怒沉不從牒請改正帝喜曰誠慤人也遂眷遇之召侍左右論說書史以事降編修復待制再降編修給事中鄭相同言尊無二上故事啟事東宮惟東宮官屬稱臣朝臣則否今一體稱臣於禮未安沉駁之曰東宮國之大本繼聖體承天位者也尊東宮所以尊主

上相同言非是帝從之尋以奏對失旨降涇源縣教諭未行復爲翰林院典籍尋擢東閣大學士初帝謂沉曰聖賢立教有三曰敬天曰忠君曰孝親故在經傳未易會其要領爾等以三事編輯至是書成賜名精誠錄命沉撰序居一年降翰林侍書尋改國子博士踰年以老乞歸卒沉嘗著辨言孔子封王爲非禮後布政使夏寅祭酒丘濬皆以封孔子王及諡爲非禮至嘉靖九年更定祀典改稱至聖先師實祖沉說也鮑恂字仲孚崇德人受易於臨川吳澄好古力行著大易傳義學者稱之元泰定元統間省試第一人至正中薦授温州路學正學士張翥御史劉彥博薦入翰林不就洪武四年初以科舉取士召恂同宋濂爲考試官十五年禮部主事劉庸

薦恂及安吉余詮高郵張長年登州張紳皆明經老成達治體可備顧問帝遣使辟召恂詮長年先至恂年八十餘長年詮亦皆逾七十矣帝見之甚喜賜坐顧問翌日並命爲文華殿大學士恂等固辭帝曰特煩輔導太子耳免卿等早朝從容晏語度不負平生所學何辭爲皆言老且病辭益力遂放還後紳至以爲鄆縣教諭尋召爲右僉都御史終浙江左布政使其明年以耆儒徵者曰全思誠字希賢上海人博雅弘粹少負文名亦授文華殿大學士又明年請老賜敕致仕危素字太樸金谿人唐撫州刺史全諷之後少通五經遊吳澄范梈門皆折行輩與爲禮至正元年用大臣薦授經筵檢討修宋遼金三史及注爾雅成賜金及宮人不受由國子助

教遷翰林編修纂后妃等傳事逸無據素買餽餅饋宦寺叩
之得寔乃筆諸書卒為全史遷太常博士兵部員外郎監察
御史工部侍郎轉大司農丞禮部尚書時亂將亟素每抗論
得失丞相賀惟一曰君向寡言今何多也素曰不敢畏丞相
畏後世史官耳十八年參中書省事請專任平章定住總西
方兵毋迎帝師悞軍事用普顏不花為參政經略江南立兵
農宣撫使司以安畿內任賢守令以撫流竄之民且諫曰今
日之事宜臥薪嘗膽力圖中興尋進御史臺治書侍御史二
十年拜參知政事孛羅帖木兒與擴廓帖木爾俱平章總兵
河南漸生釁端素建議用孛羅為丞相治四川擴廓為丞相
治河南各責其成功順帝

用俄除翰林學士承旨孛羅

人相出為嶺北行省左丞言事不報棄官居房山素為人侃
直數有建白敢任事順帝令寫釋氏書不可又諫罷刊行三
藏經上都宮殿火敕重建大安睿思二閣素諫止之請親祀
南郊築北郊以斥合祭之失因進講陳民間疾苦詔為發錢
粟賑河南永平民奉命墾田雄霸關土幾萬畝淮南兵亂素
往廉問假便宜發楮幣賑維揚京口饑元末諸臣中最有聲
居房山者四年明師將抵燕淮王帖木兒不花監國起為承
旨如故素甫至而師入乃趨所居報恩寺入井寺僧大梓力
挽起之曰國史非公莫知公死是死國史也素遂止兵迫史
庫往告鐘撫吳勉輦而出之元實錄得無失太祖召素至京
洪武二年授翰林侍講學士數訪以元興亡之故且詔撰皇

陵碑文皆稱旨會甘露降鍾山廷臣稱賀翰林應奉睢稼曰
聖人之德上及太清中及太寧下及萬靈則膏露下起居注
魏觀曰陛下寬租賦減徭役百姓歡豫此所謂和氣之凝也
於是素進曰王者敬養耆老則甘露降而松柏受之茲者降
於松柏蓋陛下尊賢養老所致也宜告宗廟頒示史館帝不
許素等皆頓首謝頃之坐失朝被劾罷居一歲復故官兼弘
文館學士賜小車免朝謁嘗偕諸學士賜宴屢遣內官勸之
酒御製詩一章以示恩寵命各以詩進素詩最後成帝獨覽
而善之曰素老成有先憂之意時素已七十餘矣他日帝御
東閣側室素行簾外履聲橐橐然帝問誰也對曰老臣危素
帝哂曰朕謂是文天祥耳御史王著等希旨論素亡國之臣

不宜列侍從詔謫居和州守余闕廟歲餘卒先是至元間西
僧嗣古妙高欲燬宋會稽諸陵夏人楊輦真珈爲江南總攝
請如二僧言遂悉掘徽宗以下諸陵攫取金寶盡哀帝后遺
骨瘞於杭之故宮築浮屠其上名曰鐘南以示厭勝又截理
宗顱骨爲飲器真珈敗其資皆籍於官飲器亦入宣政院以
賜所謂帝師者素在翰林時宴見備言始末帝歎息良久謂
素曰宋帝初無大失德元與宋亦無世仇旣取其國何縱奸
人肆惡如此遂命北平守將購得顱骨於西僧汝納所諭有
司厝於高坐寺西北其明年紹興以永穆陵圖來獻遂敕葬
故陵蓋實自素發之云

張以寧字志道占田人父一清元福建江西行省參知政事

以寧年八歲或訟其伯父於縣繫獄因詣縣伸理尹異之命賦琴堂詩立就伯父得釋以寧用是知名泰定中以春秋舉進士由黃巖判官進六合尹坐事免官滯留江淮者十年順帝徵爲國子助教累至翰林侍讀學士知制誥在朝宿儒虞集歐陽元揭傒斯黃潛之屬相繼物故以寧有俊才博學強記擅名於時人呼小張學士明師取元都與危素等偕赴京奏對稱旨復授侍講學士特被寵遇帝嘗登鍾山以寧與朱升秦裕伯等扈從擁翠亭給筆札賦詩洪武二年秋奉命使安南封其主陳日燿爲國王御製詩一章遣之甫抵境而日燿卒國人乞以印詔授其世子以寧不聽留居洱江上諭世子告哀於朝且請襲爵旣得命俟後使者林唐臣至然後入

境將事事竣教世子服三年喪令其國人效中國行頓首稽首禮安南大悅天子聞而嘉之賜璽書比諸陸賈馬援再賜御製詩八章及還道卒詔有司歸其柩所在致祭以寧爲人潔清不營財產奉使往還襪被外無他物本以春秋致高第故所學尤專春秋多所自得譏胡傳辨疑最辨博惟春王正月考未就寓安南踰半歲始卒業閱月病革竟死元故官來京者素及以寧名尤重素長於史以寧長於經素宋元史藁俱失傳而以寧春秋學遂行家古田翠屏山下學者稱翠屏先生門人石光霽字仲濂泰州人讀書五行俱下洪武十三年以明經舉授國子學正進博士作春秋鈎元能傳以寧之學裕伯字景容大名人仕元累官至福建行省郎中遭世亂

棄官客揚州久之復避地上海養母母卒居喪盡禮張士誠據姑蘇遣人招之拒不納吳元年太祖命中書省檄起之裕伯對使者曰食元祿二十餘年而背之不忠也母喪未終忘哀而出不孝也乃上書中書省固辭洪武元年復徵稱病不出帝乃手書諭之曰海濱民好鬪裕伯智謀之士而居此地堅守不起恐有後悔裕伯拜書涕泗橫流不得已偕使者入朝授侍讀學士固辭不允帝登鍾山與學士朱升張以寧等扈從擁翠亭給筆札賦詩甚見寵待二年改待制旋爲治書侍御史三年始詔設科取士以裕伯與御史中丞劉基爲京畿主考官裕伯博辨善論說占奏悉當帝意帝數稱之出知隴州卒於官

安然祥符人徙居潁州元季以左丞守萊州明兵下山東率衆歸附洪武元年授起居注轉給事中尋擢山東參政撫綏流移俸餘悉給公用帝聞而嘉之召爲工部尙書除河南參政歷浙江布政使入爲御史臺右大夫改左中丞坐事免十四年復召爲四輔官先是帝罷中書省散其職掌於六部詔天下舉賢才戶部尙書范敏薦耆儒王本杜佑龔敷杜敷趙民望吳源等召至告之太廟以本佑龔敷爲春官杜敷民望源爲夏官秋冬闕命本等攝之兼太子賓客位公侯伯都督之次屢賜敕諭隆以坐論之禮命協贊政事均調四時會立冬朔風釀寒成冬令帝以爲本等功賜敕嘉勉又月分三旬人各司之以雨暘時若驗其稱職與否刑官議獄四輔及諫

院覆覈奏行有疑讞四輔官封駁居無何敦等四人相繼致仕召然代之而本後亦坐事誅諸人皆老儒起田家惇朴無他長獨然久歷中外練達庶務眷注特隆尋卒繼然爲四輔者李幹何顯周幹出爲知府佑顯周俱罷去是官遂廢不復設本不詳其籍里佑安邑人嘗三主本布政司鄉試稱得人龔敦鉛山人以行誼重於鄉致仕後復起爲國子司業歷祭酒坐放諸生假不奏聞免杜敦字致道壺關人舉元鄉試第一除高平教諭遷臺州學正歸家教授通易詩書三經源莆田人亦再徵爲國子司業卒於官民望藁城人幹絳州人顯周內黃人

許存仁名元以字行金華人父謙受學金履祥學者稱白雲先生太祖克金華訪謙後召存仁語大悅至應天授府學教授仍命入傅諸子尋擢國子博士從至濠州太祖將改葬仁祖問何服存仁曰禮改葬總旣葬除之太祖愴然命有司以粗布製素冠白纓衫經嘗命講尚書洪範休咎徵之說又嘗問孟子何說爲要存仁以行王道省刑薄賦對吳元年擢祭酒存仁出入左右垂十年自稽古禮文事至進退人才無不與論議言官以移用官物坐存仁罪帝笑不問旣而告歸僉事程孔昭劾存仁寓杭取妾以象牙飾床失師臣體詔安置韶州遇赦歸忌者劾存仁不應赦條逮死獄中弟存禮有學行任北平教授贛人劉丞直者字宗弼元至正進士由博士擢司業與存仁同寮存仁將請告丞直曰不可至上方天與

人歸公儒臣宜俟登極存仁既得罪始悔不用丞直言丞直
至浙江按察司僉事以才識為帝所稱

宋訥字仲敏滑人父壽卿元侍御史封魏國公諡忠肅訥性
持重學問該博至正中舉進士任鹽山尹棄官歸洪武二年
徵儒士十八人編禮樂諸書訥與焉事竣不仕歸久之用四
輔官杜敷薦授國子助教橫經發難學者翕然宗之十五年
超遷翰林學士命撰國子監宣聖廟碑稱旨賞賚甚厚頃之
改文淵閣大學士嘗寒附火燎脇下衣至膚始覺帝製文警
之未幾遷祭酒時功臣子弟皆就學及歲貢士恒數千人訥
為嚴立學規講解無虛晷止學舍不宿於家帝悅十八年復
開進士科取士四百七十有奇由太學者三之二黃湜練子

寧許觀等皆預再策進士亦如之帝大悅製詞褒美助教金
文徵等疾訥搆之吏部尚書余煥牒令致仕訥陛辭帝驚問
大怒誅煥文徵等留訥如故訥嘗病帝曰訥有壽骨當愈未
幾果愈帝使畫工圖訥其像危坐有怒色帝問昨何怒訥
驚對曰諸生有趨踣者碎茶器臣愧失教故自訟耳且陛下
何自知之帝出圖訥頓首謝長子麟舉進士擢御史出為望
江主簿帝念訥老召還侍訥二十三年春訥再病仍止學舍
病革麟請歸私第叱曰時當丁祭敢不敬耶祭畢昇歸舍而
卒年八十帝悼惜自為文祭之又遣官祭於家為治葬地文
臣四品給祭葬者自訥始正德中諡訥文恪云訥嘗應詔陳
邊事言海內又安蠻陬奉貢惟沙漠尚煩聖慮若置不治久

且爲患窮追遠擊則士馬疲敝轉輸不繼陛下爲聖子神孫計不過謹備而已備邊在乎實兵實兵在乎屯田漢本始中匈奴率十餘萬騎而南趙充國將四萬騎分屯緣邊九郡單于聞之引去陛下宜於諸將中選謀勇數人以東西五百里爲制隨其高下立法分屯如充國兵數斟酌損益率五百里屯一將布列邊地遠近首尾相應耕作以時遇敵則戰寇去則耕此長策也帝是之邊防多用其言訥既卒久之帝思訥官其次子復祖爲司業誠諸生守訥學規違者罪至死帝開國時卽重師儒官許存仁魏觀爲祭酒老成端謹後皆坐事誅樂韶鳳官一年致仕李敬吳顥等皆不稱職訥稍晚進最蒙遇與訥定學規者司業王嘉會龔敷三人者年高鬚髮皓

白終日危坐堂上肅然而趙俶錢寧張美和聶鉉蕭執等皆名儒當洪武時先後爲博士助教學錄以故諸生多所成就敷遷祭酒嘗爲四輔官見安然傳嘉會字原禮嘉興人以薦徵賦詩稱旨授翰林院檢討擢國子監司業十六年亦以老疾請優詔留之年八十卒官贈卹甚厚

趙俶字本初山陰人元進士洪武六年徵至論經史貫串古今除國子博士帝御奉天殿召俶等曰經學必宗孔子母以儀秦縱橫俶請以正定十三經頒示天下屏戰國策及陰陽識卜諸書勿列學宮明年擇諸生穎拔者三十五人命俶專領之教以古文尋擢李擴黃義等入文華武英二堂說書皆見用九年御史臺言博士俶以詩經教成均四年其弟子多

爲方岳重臣及持節各部者今年逾懸車請賜骸骨乃進俶
秩以翰林院待制致仕賜內帑錢治裝宋濂率同官暨諸生
千餘人送之卒年八十一子圭玉兵部侍郎出知萊州有聲
錢宰字子予會稽人吳越武肅王十四世孫至正間中甲科
親老不仕洪武二年徵爲國子助教作金陵形勝論歷代帝
王廟樂章皆稱旨居數年乞休進國子博士賜敕遣歸二十
七年帝觀蔡氏書傳象緯運行與朱子詩傳相悖其他註與
鄱陽鄒季友所論有未安者徵天下宿儒訂正之兵部尙書
唐鐸舉宰及致仕編修張美和助教靳權等行人馳傳徵至
命學士劉三五總其事江東諸門酒樓成賜百官鈔宴其上
宰等賦詩以獻帝大悅論諸儒年老願歸者先遣之宰年最

高請留帝喜書成賜名書傳會選頒行天下厚賜宰等令馳
驛歸宰卒年九十六美和名允韶以字行清江人年十三能
詞賦元末累舉不仕洪武三年以薦爲縣學教諭後遷國子
助教改翰林院編修致仕歸帝親爲文賜之復與宰等並徵
書成遣還聶鉉者字器之美和同邑人以洪武四年進士爲
廣宗丞疏免旱災稅秩滿入覲獻南都賦及洪武聖德詩授
翰林院待制改國子助教遷典籍與美和同賜歸十八年復
召典會試欲留用之乞便地自養令食廬陵教諭俸終其身
時稱成均三助謂鉉與美和及嘉興貝瓊也
蕭執字子所泰和人洪武四年鄉舉爲國子學錄五年夏至
帝有事北郊召尙書吳琳主事宋濂率文學士以從執偕陶

凱等十二人見帝齋所令賦詩親第甲乙復令賦山柅花閱
執詩喜遍示諸臣召使前寵眷傾一時時帝留意文學往往
親試廷臣執與陳觀知遇尤異觀以訓導入覲試王猛捫蝨
論立擢陝西參政尋召還侍左右應制作鍾山賦賜金幣在
陝以廉謹稱或問陝產金其鑛何狀觀太驚曰吾備位藩寮
何金之問其卒也妻子幾無以自存而執以親老乞歸親歿
廬墓側申國公鄧鍾勦龍泉寇蔓及泰和執往責之鍾爲禁
止邑人以安兩人皆篤行君子也

桂彥良名德俱以字行慈谿人元鄉貢進士爲包山書院山
長改平江路學教授罷歸張士誠方國珍交辟不就洪武六
年徵詣公車以白衣賜宴授太子正字帝嘗出御製詩文彥

良就帝前誦聲徹殿外左右驚愕帝嘉其朴誠時選國子生
蔣學等爲給事中舉人張唯等爲編修肄業文華堂命彥良
及宋濂孔克表爲之師嘗從容有所咨問彥良對必以正帝
每稱善至書其語揭便殿七年長至詞臣撰南郊祝文用予
我字帝以爲不敬彥良曰成湯祭上帝曰予小子履武王祀
文王之詩曰我將我享古有此言帝色霽曰正字言是也時
御史臺具獄令詞臣覆讞彥良所論釋者數十人遷晉王府
右傅帝親爲文賜之彥良入謝帝曰江南大儒惟卿一人對
曰臣不如宋濂劉基帝曰濂文人耳基峻隘不如卿也彥良
至晉製格心圖獻王後更王府官制改左長史朝京師上太
平十二策帝曰彥良所陳通達事體有裨治道世謂儒者泥

古不通今若彥良可謂通儒矣十八年請告歸卒福王時追諡敬裕帝開國初特重師傅既命宋濂教太子而諸王傳亦慎其選彥良與陳南賓蕭岐等皆宿儒老生李希顏者尤以嚴見憚駙馬胡觀亦為遴徐宗實教之其後永樂洪熙時長史董子莊趙季通劉淳楊黼金實蕭用道宋子環之屬皆有名顯是以降王官不為清流無足錄者矣南賓名光裕以字行茶陵人元末為全州學正洪武三年聘至都除無棣丞歷膠州同知所至以經術飾吏事召為國子助教嘗入見講洪範九疇帝大喜書姓名殿柱後御注洪範多采其說擢蜀府長史蜀獻王好學敬禮尤至造安車以賜為構第名安老堂二十九年與方孝孺同為四川考試官詩文清勁有法卒年

八十岐字尚仁泰和人五歲而孤事祖父母以孝聞有司屢舉不赴洪武十七年詔徵賢良強起之上十便書萬餘言時帝刑罰過中訐告風稍熾岐請禁止實封以杜誣罔依律科獄以信詔令語皆指切召見授潭王府長史力辭忤旨謫雲南楚雄訓導岐即日行遣騎追還歲餘改授陝西平涼再歲致仕復召與錢宰等考定書傳賜幣鈔給驛歸嘗輯五經要義又取刑統八韻賦引律令為之解合為一集嘗曰天下理本一出乎道必入乎刑吾合二書使觀者有所省也學者稱正固先生子忠幼被掠臨洮百戶何氏收為壻岐自平涼歸遇於道携還家其後遂為顯族子莊名琰以字行江西樂安人博學有操行洪武中以鄉薦除雲南學官遷知茂名縣成

祖擢爲國子司業出爲趙王府右長史恭謹小心隨事匡正
王多過帝輒以責長史子莊夾持王愈堅永樂十八年春當
陪祀國社夙興正衣冠端坐而卒季通字師道天台人由教
官歷永豐龍溪知縣與修太祖實錄除國子博士進司業出
爲趙王府左長史與子莊同心輔導多所裨益藩府賢僚首
稱趙董淳南陽人洪武末爲原武訓導周王聘爲世子師尋
言於朝補右長史以正輔王端禮門槐盛夏而枯淳陳咎徵
進戒王用其言修省枯枝復榮王旌其槐曰摠忠致仕十餘
年而卒年九十有七黼吉水人由進士授御史仁宗卽位上
疏言十事擢衛王府右長史盡心獻替未嘗苟取一錢宣德
初卒實開化人成祖卽位上書言治道帝嘉之復對策稱旨

除翰林典籍預修太祖實錄永樂大典選爲東宮講官歷左
春坊左司直仁宗卽位除衛府左長史正統初卒爲人孝友
敦行誼閱經史日有程限至老不輟用道泰和人建文中舉
懷才抱德詣闕試文章擢靖江王府直史召入翰林修類要
燕師渡淮與周是修同上書指斥用事者永樂初預修太祖
實錄改右長史從王之藩桂林嘗爲王陳八事曰愼起居寡
嗜慾勤學問養德性簡鞭朴之刑無侵下人利常接府僚以
通羣情簡擇謹厚之人以備差遣又作端禮體仁遵義廣智
四門箴以獻久之以疾乞歸成祖怒貶宣府鷄兒巡檢卒子
昺由進士官湖廣左布政使天順四年舉治行卓異召拜禮
部尙書初兩京尙書缺多用布政使爲之自昺後遂無拜尙

書者恒重厚廉靜有方面聲及居禮部疎於政體又不善奏對帝不懌調南京尋卒子環廬陵人由進士爲庶吉士除驗封主事歷考功郎中從師達採木湖廣以寬厚得衆心仁宗卽位簡授梁府右長史改越府和易澹泊居兩府皆有賢聲宣德中卒官

李希顏字愚庵邠人隱居不仕太祖手書徵之至京爲諸王師規範嚴峻諸王有不率教者或擊其額帝撫而怒高皇后問故曰烏有以堯舜訓吾子顧怒之耶乃解授左春坊右贊善諸王就藩希顏歸舊隱部使騶輿訪之途遇一老枕橐臥前驅蹴之起乃希顏也倚橐與語竟日而別閭里宴集希顏著緋袍戴笠往客嘲之笑曰戴者本質著者君賜也

徐宗實名屋以字行黃巖人少穎悟力學與弟宗茂宗原自相師友教生徒條約嚴肅用是知名洪武中被薦除銅陵簿請告迎養忤帝意謫戍淮陰驛朝廷選駙馬都尉東川侯胡海子觀在選中帝擇師難其人以命宗實旣成婚會當講授中使援他府例置駙馬位中堂北牖下南向而布師席於西階上東向宗實手引駙馬位使下然後爲說書左右大驚相顧以目帝聞而嘉之召宗實慰勞數四洪武末授蘇州通判奏發官粟二十萬石以活饑民春水暴鬻堤倡議修築吳人皆以爲便節婦王氏元季未及旌宗實爲之請禮部以前朝事不當允宗實言武王封比干墓獨非前朝事乎婦遂得旌建文二年超擢兵部右侍郎奉使兩淮海州女子年十六許

嫁而夫亡歸夫家持服養其姑姑死既葬誓不嫁採訪使上其禮部謂年未五十不在旌例宗實言此女哭夫筮嫁之初剪髮葬姑之後雖刺目截耳無以復加應與立志卓異者同科詔如宗實言已坐奉使過家稽留貶尚寶司丞數月復起爲侍郎燕事急使兩浙招義勇成祖卽位疏乞骸骨歸逾二年坐事逮至京道卒

孔希學字士行先聖五十六代孫也世居曲阜祖思聰仕元爲教諭有學行仁宗時訪先聖世嫡以思聰襲封衍聖公卒諡文肅子克堅襲至元元年疏請修飾廟像順帝以山東曆日錢之半給其費且命御史孔思立持楮幣二萬五千緡勒石紀績至正六年中書言衍聖公階止嘉議大夫與爵不稱

乃進通奉大夫予銀印十五年有薦其明習禮樂者徵爲同知太常禮儀院事以子希學襲封其冬遷中臺治書侍御史辭歸明年拜山東道肅政廉訪使既受詔復辭會東土大亂挈家北次藁城丞相賀太平薦爲集賢直學士以希學爲祕書卿遣使卽藁城起之既至值毛貴亂畿甸廷議遷都關中克堅曰天子當與宗廟社稷共存亡奈何輕棄今勤王兵漸集與決戰賊可平也乃止十九年遷禮部尙書知貢舉四方士避寇多聚京師克堅請設流寓科以取之其冬遷陝西行臺侍御史李思齊察罕帖木爾相攻秦隴間中朝不能制思齊部將降於朝行省議納之而遣張良弼往禦中丞袁煥與克堅諍曰兩軍不敢犯奉元者以無名耳今納其叛將且發

兵禦之是引虎自噬也行省不從渙被劾去克堅亦自劾歸
月餘思齊及良弼戰於鹿臺良弼敗奉元果陷二十二年除
國子祭酒順帝賜上尊太子書大成殿額以賜克堅以世亂
不樂居位謝病還闕里後起集賢學士山東廉訪使皆不赴
洪武元年三月徐達下濟寧克堅稱疾遣希學來見達送之
京師希學奏父病不能行太祖敕諭克堅末言稱疾則不可
會克堅亦來朝遇使者淮安皇恐兼程進見於謹身殿問以
年對曰臣年五十有三日爾年未邁而疾嬰之今不煩爾以
官爾家先聖後子孫不可不學爾子溫厚俾進學克堅頓首
謝即日賜宅一區馬一匹米二十石明日復召見命以訓厲
族人因顧侍臣曰先聖後特優禮之養以祿而不任以事也

十一月命希學襲封衍聖公置官屬曰掌書曰典籍曰司樂
曰知印曰奏差曰書寫各一人立孔顏孟三氏教授司教授
學錄學司各一人立尼山洙泗二書院各設山長一人復孔
氏子孫及顏孟大宗子孫徭役又命其族人希大爲曲阜世
襲知縣而進行聖公秩正二品階資善大夫賜之誥希大階
承事郎賜之敕三年春克堅以疾告歸遣中使慰問疾篤詔
給驛還家賜白金文綺舟次邳州卒六年八月希學服闋入
朝命所司致廩餼從人皆有賜復勞以敕賜襲衣冠帶九月
辭歸命翰林官餞於光祿寺資白金文綺明年二月希學言
先聖廟堂廊廡圯壞祭器樂器法服不備乞命有司修治先
世田兵後多蕪而徵賦如故乞減免並從之自是每歲入朝

班亞丞相皆加宴資希學好讀書善隸法文詞爾雅每賓客
燕集談笑揮洒爛然成章承大亂之後廟貌服物盡失其故
畢力修舉復還舊觀十四年卒命守臣致祭子訥十七年正
月襲封命禮官以教坊樂導送至國學學官率諸生二千餘
人迎於成賢街自後每歲入觀給符乘傳帝既革丞相官遂
令班文臣首訥性恭謹處宗黨有恩建文二年卒子鑑襲有
孝行嗣爵二年卒成祖卽位遣使致祭子彥縉永樂八年襲
甫十歲命肄業國學久之遣歸十五年修闕里文廟成御製
碑文勒石仁宗踐阼彥縉來朝仁宗語侍臣曰外蕃貢使皆
有公館衍聖公假館民間非崇儒重道意遂賜宅東安門外
宣德四年彥縉將遣使福建市書咨禮部部臣以聞命市與

之已奏闕里雅樂及樂舞生冠服敝壞詔所司修治景泰元
年帝幸學彥縉率三氏子孫觀禮賜坐彝倫堂聽講幸學必
先期召衍聖公自此始彥縉幼孤能自立然與族人不睦景
泰六年族祖克昫等疏訐其數事彥縉亦訐克昫章俱下山
東巡按議虛實相半景帝置弗問未幾彥縉卒子承慶先卒
孫弘緒甫八歲帝驛召至京襲封賜玉帶金印簡教授一人
課其學英宗復辟入賀召見便殿握其手置膝上語良久弘
緒纔十歲進止有儀帝甚悅每歲入賀聖壽帝聞其賜第湫
隘以大第易之凡南城賞花西苑較射皆與焉弘緒生而貴
又恃嬖翁大學士李賢多過舉成化五年被劾按治奪爵爲
庶人令其弟弘泰襲弘泰及爵仍歸弘緒子弘泰旣嗣爵弘

治十一年山東按臣言弘緒遷善改行命復冠帶明年六月
聖殿災弘泰方在朝弘緒率子弟奔救素服哭廟蔬食百日
弘泰還亦齋哭如居喪弘泰生七月而孤奉母孝與弘緒友
愛無間言十六年卒弘緒子聞韶襲明年新廟建規制踰舊
遣大學士李東陽祭告御製碑文勒石正德三年以尼山洙
泗二書院及鄒縣子思子廟各有祀事奏請第聞禮王之帝
授聞禮五經博士主祀事世以衍聖公第爲之著爲令兩書
院各設學錄一人薦族之賢者充焉六年山東盜起聞韶與
巡撫趙璜請城闕里遷曲阜縣治以衛廟不果行嘉靖二十
五年卒子貞幹襲三十五年入朝卒子尙賢襲巡撫丁以忠
言尙賢冲年宜如弘泰例國學肄業從之萬曆九年庶母郭

氏許尙賢帝爲革供奉女樂二十六戶令三歲一朝十七年
尙賢請仍比歲入賀許之尙賢博識天啟元年卒無嗣從弟
子胤植襲胤植祖貞寧衍聖公貞幹弟也仕爲五經博士父
尙坦國學生追封衍聖公胤植先爲博士尙賢既喪子遂育
爲嗣天啟四年以覃恩加太子太保崇禎元年加太子太傅

明史彙

列傳第二十終

敬慎堂

盡改元季苛政擢兵部郎中遷濟南知府濟南屢經兵燹比戶彫殘且多衛將練兵屯田其間修至調劑有方兵民相安流亡復業帝嘉之洪武四年拜吏部尚書六部之設自洪武元年鎮江滕毅首長吏部一切選除考課佐省臺裁定然法制猶未畫一修乃偕侍郎李仁詳考舊典參以時宜按地劇僻爲設官煩簡凡庶司黜陟及課功覈實之法皆精心籌畫銓法秩然未幾卒官其後部制屢創令人覲官各舉所知定內外封贈廕敘之典自浮山李信始天下朝正官各造事蹟文冊圖畫土地人民以進及立撥用吏員法自崑山余胤始倣唐六典自五府六部都察院以下諸司設官分職之制編集爲書曰諸司職掌定吏役考滿給絲法以爲司衛府縣首

領選監生能文章者兼除州縣官及學正教諭自泰興翟善始三年一朝考覈等第自沂水杜澤始此洪武時銓政大畧也六部初屬中書省權輕尚書侍郎仰承丞相意指毅修及詹同吳琳趙好德輩居吏部稱賢然亦無大建豎至十三年中書省革部權乃專銓衡爲尤要顧帝用法嚴得久其位者寡胤以排宋訥誅善貶澤未數月罷惟信歷侍郎拜尚書幾二載卒於官云毅字仲弘太祖征吳以儒士見留徐達幕下尋除起居注命與楊訓文集古無道之君若桀紂秦始皇隋煬帝行事以進曰吾欲觀喪亂之由以爲炯戒耳毅與宋濂等日侍左右甚見寵遇吳元年出爲湖廣按察使尋召還擢居吏部一月改江西行省參政卒官好德字秉彝汝陽人由

戶部尚書改官帝嘉其典銓平明嘗召與四輔官坐論治道於內殿命畫史圖像禁中終陝西參政初元末時汝潁兵起好德謂妻李曰元運將終東南當有真主欲往從之汝孕生男可名太平他日求我灑泣而別謁太祖金陵歷官有政績遂至六卿長其子長名毅事太祖成祖官亦至工部侍郎兼少詹事善字敬夫洪武中貢入太學授吏部文選司主事歷員外郎二十六年尚書詹徽侍郎傅友文誅命善署部事旋進侍郎署尚書事逾年實授尚書明於經術奏對合帝意帝曰善雖年少字量恢廓他人莫及也欲爲營第於泰輿以善不忍奪人自益而止欲除其家戎籍善曰戍卒宜增豈可以臣破例帝益以爲賢坐法當刑父爲陳乞降宣化知縣以終

信起家縣掾焮明經澤訓導皆用薦擢顯與修定銓法者李仁唐縣人爲陳友諒招討使王師克武昌來歸以常遇春薦代陶安知黃州府事由給事中擢侍郎修卒仁亦進尚書謫青州政最擢戶部侍郎尋致仕吳琳黃崗人太祖下武昌求荆楚名儒以詹同薦召爲國子助教與同並教胄子文采不如同而經術過之吳元年除浙江按察司僉事復入爲起居注命齎幣帛求書於四方洪武四年遷太常卿進兵部尚書典京闈鄉試六年改吏部尚書又與同迭主部事踰年乞歸帝嘗遣使察之使者潛至旁舍一農人坐小杙起拔稻苗布田貌甚端謹使者前曰此有吳尚書者在否農人斂手對曰琳是也使者以狀聞帝爲嘉歎

楊思義不詳其籍里太祖稱吳王授起居注初錢穀隸中書省吳元年始設司農卿以思義爲之明年建元洪武設六部改爲戶部尚書帝諭思義曰先王之世無不耕之民不蠶之女自什一制湮技巧作而農桑廢一民負耒百家待食一女理織百夫待衣欲民不貧何可得也思義請令民間皆植桑麻四年始徵其稅不種桑者輸絹不種麻者輸布如周官里布法詔可帝念水旱不時緩急無所恃命思義令天下立預備倉明年舉耕藉禮命思義損益前代儀節上之思義首邦計獨以興農桑振災荒爲急雖本帝意而經畫詳密時稱其知本計云調陝西行省參政卒於官自思義外滕德懋費震范敏茹太素楊靖之屬頗有足稱者德懋字思勉吳人元季

爲浙江行省掾參政朶耳只班討方國珍辟爲參謀渡海颶風大作神色自若國珍降留撫台州台人德之太祖徵授中書省掾從征陳友諒除知信州以才力不逮辭改建昌同知陳氏故臣王浦守建昌不法德懋持之以正多所悛改遷知潭州進湖廣行省左右司郎中召拜兵部尚書尋改戶部尚書以事免官卒德懋才辨豪爽器量弘偉長於奏疏一時招徠詔諭之文多出其手敏閩鄉人洪武八年舉秀才擢戶部郎中十三年命署尚書事未幾卽授試尚書薦耆儒王本等皆拜四輔官帝以徭役不均命編造黃冊敏議百一十戶爲里丁多者十人爲里長鳩一里之事以供歲役十年一周餘百戶爲十甲後遂仍其制不廢敏尋罷官震鄱陽人洪武初

以賢良徵爲吉水知州寬惠得民擢漢中知府歲凶盜起發倉粟十餘萬斛貸民俾秋成還倉盜聞皆來歸令占宅自爲保伍得數千家至秋大熟悉還前粟帝聞而嘉之後坐事被逮以有善政特釋爲寶鈔提舉十一年帝謂吏部曰朝廷懸爵祿以鼓舞天下士資格者爲常流設耳有才能而居下位者當不次用之遂超拜震戶部侍郎其餘量材超擢者九十五人震尋進尚書奉命定丞相御史大夫以下歲祿之制刻石官署出爲湖廣布政使以老致仕太素靖皆別有傳洪武初有張琬者鄱陽人以貢士試高等授給事中改戶部主事一日帝問天下財賦戶口之數口對無遺帝悅立擢左侍郎謹身殿災上言時政歲饑請蠲民租百萬餘石俱見嘉納琬

才敏有心計以疾卒於官年二十七時人情之

周禎字文典江寧人元末流寓湖南太祖平漢用爲江西僉事吳元年進大理丞旋爲卿太祖以唐宋皆有成律斷獄惟元以一時行事爲條格胥吏易爲奸詔禎與李善長劉基陶安滕毅等定律令少卿劉惟謙丞周漬與焉書成太祖稱善洪武元年設刑部以禎爲尚書尋改治書御史出爲廣東行省參政時省治初開正官多缺吏治鮮勸懲香山丞冲敬興縣治招流移以勞卒官禎爲文祭之聞者感動因奏上郡邑良吏雷州同知余騏孫惠州知府萬迥乳源知縣張安仁清流知縣李鐸揭陽縣丞許德興學建城功復舉廉州知府脫因歸善知縣木寅寅土司脫因蒙古人也二年復召爲刑部

尚書尋引疾致仕帝卽位初懲元寬縱用法太嚴奉行者重足立律令既具吏士始知循守其後數有釐正皆以禎書爲權輿云惟謙不詳何許人吳元年以才學舉由大理少卿改刑部郎中歷廣西四川參政入爲刑部尚書命擬新律條例揭於四壁刪繁損舊輕重得宜帝善之頒行天下後坐事免禎字伯寧鄱陽人江西十才子之一也官亦至刑部尚書端復初字以善溧水人本姓端木子貢裔也從省文稱端氏元末爲小吏常遇春鎮金華召致幕下未幾辭去太祖知其名召爲徽州府經歷令民自實田彙爲圖籍積弊盡刷遷吉州府通判丁母憂服闋召赴京除磨勘司丞遷爲令時官署新立案牘埴委復初鈎稽無遺每奏對帝嘗延譽之性嚴峭

人不敢干以私僚屬多貪敗復初獨以清白免洪武四年超拜刑部尚書用法平杭州飛糧事覺逮繫百餘人詔復初往治分鞫諸囚合其辭參焉直僞立得知府以下皆服罪明年出爲湖廣參政令民來歸者復其賦一年流亡畢歸以治辨聞坐事召還卒於京子孝文翰林待詔孝思翰林待書先後使朝鮮並著清節朝鮮人爲立雙清館云有劉敏者肅寧人舉孝廉爲中書吏暮市蘆龍江旦載於家而後入治事妻織蘆鬻以奉母或遺磁瓦器懸諸梁上卒還之爲楚相府錄事


中書以沒官女婦給文臣家衆勸其請給以事母敏固辭曰事母子婦事何預他人及省臣敗吏多坐誅敏獨無所預帝賢之擢拜工部侍郎改刑部出爲徽州府同知有惠政卒於

官

李質字文彬德慶人有材畧博涉文史至正末行省何真辟置麾下德慶民倡亂真遣質歸募兵二萬人平之旁郡多賴其保障好施予重文雅名士客嶺南者茶陵劉三吾江右伯顏子中羊城孫蕢建安張智等皆往依焉洪武元年大軍下廣州質以城歸隨真入見帝慰勞之授中書斷事明年改都督府斷事強力執法丞相都督咸敬憚之五年擢刑部侍郎進尚書治獄平恕遣賑飢山東御製詩章餞之尋出為浙江行省參政居三年惠績著聞帝念質老召還京師嘗入見便殿訪以時政得失直言無隱復起為靖江王府右相王罪廢質亦坐死黎光者東莞人以鄉薦拜御史巡蘇州請賑水災

全活甚衆巡鳳陽上封事悉切時弊帝嘉之洪武九年擢拜刑部侍郎執法不阿為御史大夫陳寧所忌以事中之死貶所二人皆粵產以功名顯卒因剛直被禍時人惜焉

單安仁字德夫濠人少為府吏元末江淮兵亂安仁集健少年數萬號青軍保障一方授樞密判官從鎮南王孛羅普化守揚州時諸豪角立安仁歎曰此輩皆為人驅除爾真人之興當自有別鎮南王為長槍軍所逐安仁無所屬聞太祖定集慶乃曰此真是已率衆歸附太祖大悅命為元帥即命其軍守鎮江嚴飭軍伍敵兵不敢犯移守常州其子叛降張士誠太祖知安仁忠謹弗疑也及士誠破子被擒付安仁自處之安仁守常歲餘遷浙江副使悍帥橫斂民名曰寨糧安仁



一宜於法進按察使徵爲中書左司郎中佐李善長裁斷調
瑞州守禦千戶入爲將作卿洪武元年擢工部尚書仍領將
作事安仁精敏多智計諸所營造大小中程甚稱帝意逾年
改兵部尚書請老歸賜田三千畝牛七十角歲給尚書半俸
六年起山東參政懇辭仍予致仕家居嘗奏請濬儀真南壩
至朴樹灣以便官民輪輓疏轉運河江都深港以防淤淺移
瓜洲倉廩置揚子橋西免大江風潮之患帝善其言再授兵
部尚書致仕二十年卒年八十五

朱守仁字元夫徐人元末兵起應州辟累破羣盜歷官樞密
同知守舒城明兵下廬州舉城附授中書斷事出知袁州撫
安創殘民甚德之洪武二年徵爲工部侍郎四年拜尚書奉

命察山東官吏歸奏稱旨尋改北平行省參政以餽餉不繼
謫蒼梧知縣進知容州高唐州皆有善政十年進四川布政
使司治尚簡嚴以疾致仕雲南平改威楚開南等路宣撫司
爲楚雄府起守仁知府事招集流移均劑徭役建學校興人
才居九年境內大治上計入朝郡人垂涕送之拜太僕卿首
請立草場於江北滁州等處牧放馬匹所轄十四監九十八
羣馬大蕃息馬政之修自守仁始久之致仕永樂初入朝遇
疾卒

薛祥字彥祥廬州人元季集義兵保鄉里太祖駐師和陽祥
從俞通海來歸從渡江爲水寨管軍鎮撫數從征有功洪武
元年轉漕河南夜半抵蔡河賊驟至祥不爲動好語諭散之

帝聞大喜以方用兵供億艱乃授京畿都漕運使分司淮安濬河築堤自揚達濟數百里繇役均平民無怨疾有勞者立奏請官三十餘人幽薊初附官民南遷道經淮安飢凍者衣食之死者殞焉山陽海州民亂駙馬都尉黃琛捕之誣誤甚衆祥會鞫無驗者悉原之治淮八年民相勸莫爲惡負薛公及考滿還京皆焚香祝天願薛公再來或寫眞生祠之洪武八年授工部尚書時造鳳陽宮殿帝坐殿中若有人持兵鬪殿脊者太師李善長奏諸工匠用厭鎮法帝將盡殺之祥面折善長曰太師一言壞天下人命若此恐不利於子孫乃分別交替不在工者并鐵石匠不罪奏活千數明年營謹身殿有司列中匠爲上匠帝怒其罔上命棄市詔丞相御史大夫

毋得請祥在側爭曰奏對不實竟殺千人非法因極諫得旨用腐刑祥復徐奏曰腐廢人矣莫若杖而使工帝可之又明年改天下行省爲承宣布政司以北平重邊特授祥北平布政使三年方面治行稱第一胡惟庸惡之罔以營建擾民謫知嘉興府十三年惟庸誅召爲工部尚書帝曰讒臣害汝何不言對曰臣不知也明年坐累杖死天下哀之子四人謫瓊州遂爲瓊山人孫遠正統七年進士景泰時官戶部郎中有能聲天順元年超擢本部右侍郎改工部河決開封奉詔往塞之還改戶部成化初用兵兩廣出督軍餉諭衆能破賊者以其貲予之將士爭奮賊平轉左侍郎進尚書被劾罷起南京兵部尚書再被論不納會汪直惡之諷言官更劾遠及禮

工二尚書鄒幹王復乃傳旨並罷


劉崧字子高泰和人舊名楚元末舉於鄉國初改今名崧七歲能賦詩家貧寒無爐火手皸裂而鈔錄不輟遭亂教授鄉里洪武三年舉經明行修召見奉天殿授兵部職方司郎中奉命徵糧鎮江鎮江多勲臣田租賦數累民崧力請得與民計畝輸遷北平按察司副使以廉慎爲先輕刑省事招集流亡民咸復業創立文天祥祠於學宮之側勒石學門榜示府縣勿以徭役溷諸生嘗請減僻地驛馬以益宛平帝可其奏顧謂侍臣曰驛傳勞逸不均久矣崧能言之牧民不當如是耶坐事爲胡惟庸所謫輸作京師尋放歸十三年惟庸誅徵拜禮部侍郎未幾攝吏部尚書雷震謹身殿帝廷諭羣臣陳

得失崧頓首以修德行仁對尋致仕歸踰年與前刑部尚書李敬並徵拜敬國子祭酒而崧爲司業賜鞍馬令朝夕見見輒燕語移時未旬日卒疾作猶強坐訓諸生疾革敬問所欲言曰天子遣崧教國子將責以成功而遽死乎無一語及家事帝命有司治殯殮親爲文祭之崧博學有志行微時兄弟三人共居一茆屋有田五十畝及貴無所增益十年一布被鼠傷始易之仍葺以衣其子居官未嘗以家累自隨之任北平攜一童往至則遣還哺時吏退孤燈賦詩往往達旦豫章人宗其詩爲西江派福王時追贈禮部左侍郎諡恭介李叔正字克正初名宗頤靖安人年十二能詩長益淹博與辛敬萬石楊伯謙查和卿周復輩稱江西十才子以薦授國

子學正洪武初告歸未幾復以薦徵至京師仍為學正遷渭南丞同州蒲城人爭地界累年不決行省以委叔正單騎至其處剖數語立決渭南歲輸糧二萬豪右與猾吏為奸田無定額叔正履畝丈量立法精明諸弊盡剔遷興化知縣尋召為禮部員外郎以年老乞歸不許除國子助教於是叔正三至太學矣帝方銳意文治於國學人材尤加意然諸生多貴胄不率教叔正嚴立規條旦夕端坐督課無倦色朝論賢之擢監察御史奉命巡嶺表瓊州府吏許其守踞公座簽表文叔正鞠之守得白抵吏罪太祖嘉之曰人言老御史懦乃明斷如是耶擢湖廣參政遷布政使召入為禮部侍郎十四年進尚書日本國王良懷遣僧如瑤等貢方物及馬匹帝却其

貢命叔正移書責之未幾卒於官叔正妻夏氏當陳友諒陷南昌時投井死叔正終身不再娶

任亨泰襄陽人洪武二十一年進士及第授翰林院修撰是歲再行科舉法亨泰由太學生擢第一太祖喜召祭酒宋訥褒諭之久之設詹事府即擢亨泰為少詹事亨泰儀觀甚偉端重自持進止皆有容度人以此稱之二十七年進禮部尚書日熙民江伯兒以母病割股不愈禱岱嶽母愈當殺子以祀母病痊竟殺其三歲子有司以聞帝怒曰禮為長子三年服伯兒滅絕倫理亟捕治之杖百戍海南命亨泰定旌表孝行事例亨泰議曰人子事親居則致其敬養則致其樂有疾則謹其醫藥臥水割股事匪恒經割股不已至於割肝割肝



不已至於殺子道道傷生莫此爲甚墮宗絕祀尤不孝之大者宜嚴行戒諭倘愚昧無知亦聽其所爲不在旌表之例詔從之明年議秦王喪禮因定凡世子襲爵之禮會討龍州趙宗壽命同御史嚴震直使安南諭以謹邊方無納逋逃時帝以安南篡弒絕其貢勿與通至是聞詔使至震恐亨泰爲書述朝廷用兵之故以安慰之初吳伯宗嘗使其國以名德爲交人所重亨泰科名與伯宗埒國人以爲盛事敬禮有加及楊靖徵其軍租遂奉命惟謹先後使安南者並稱吳任云使還坐私市蠻人爲僕降御史未幾思明士官與安南爭界詞連亨泰坐免繼亨泰者鞏昌門克新由薦舉爲泰州教諭洪武二十六年秩滿來朝帝召問經史及政治得失直言無隱

授左贊善時紹興王俊華以善文辭授右贊善帝諭吏部曰左克新右俊華重直言也初教官給由至京帝詢民疾苦尙嵐吳從權山陰張桓皆言臣職在訓士民事無所與帝怒曰宋胡瑗爲蘇湖教授其教兼經義治事漢賈誼董仲舒皆起田里敷陳時務唐馬周不得親見太宗且教武臣言事今旣集朝堂朕親詢問俱無以對志聖賢道者固如是乎命竄之邊方且榜諭天下學校使爲鑒戒至是克新以亮直見重不數年擢禮部尚書尋引疾命太醫給藥物不輟其俸及卒命有司護喪歸葬

唐鐸字振之虹人太祖初起兵卽事左右守濠州從定江州授西安縣丞召爲中書省管勾洪武元年湯和克延平以鐸

知府事拊輯新附士民安之居三年入為殿中侍御史復出知紹興府名拜刑部尚書改太常卿丁母憂特給半俸服闋除兵部尚書十五年初置諫院以為諫議大夫帝嘗與侍臣論歷代興廢曰使朕子孫如成康輔弼如周召則可祈天永命鐸因進曰早豫教選左右以輔元良宗社萬年福也帝又謂鐸曰人有公私故言有邪正正言務規諫邪言務謗諛鐸曰謗近忠諛近愛不為所眩則讒佞自遠帝曰朕所行有得失非人言何由知言有善者獎而行之風聞不實亦不之罪惟讒佞面諛者不可容耳未幾左遷監察御史請選賢能京官徧歷郡縣訪求賢才體察官吏選歷練老成望隆名重者居布政按察之職帝從之既復擢為右副都御史歷刑兵二

部尚書二十二年置詹事院命吏部曰輔導太子必擇端重之士三代保傅禮甚尊嚴兵部尚書鐸謹厚有德量以為詹事食尚書俸如故以鐸常請豫教故也其年致仕起詹事兼太子賓客加太子少保二十八年遣鐸招諭龍州趙宗壽先是鄭國公常茂有罪安置龍州病卒有言茂匿龍州不死帝乃召宗壽宗壽不至帝大怒命楊文為征南將軍統大軍討之鐸廉得其實言茂實病卒宗壽伏罪來朝乞罷兵乃命文移兵征奉議諸州叛蠻而以鐸參議軍事逾月斬賊首王世鐵破其蓮花大藤峽等寨諸蠻平鐸相度形勢請設奉議衛及向武河池懷集武仙賀縣等處守禦千戶所鎮以官軍皆報可鐸重厚慎密不妄取予帝以故舊遇之嘗曰都御史詹

徽剛斷嫉惡不容奸僞胥吏不得肆其貪謗訕滿朝唐鐸重厚又謂儒而無爲一切舞文弄法無所忌人心不古有若是耶徽卒坐罪誅死鐸以三十年卒京師年六十九福王時追贈太子太傅諡敬安沈潛字尚賢錢塘人鐸官兵部時同爲尚書者也由洪武十八年進士授工部屯田主事以明敏稱二十年命試兵部侍郎帝以勳臣子弟多亂法撰大誥二十二篇命潛申諭天下武臣皆令誦習使知儆惕示朝廷保全勳舊之意是月又以諭戒八條頒示將士命儒臣纂輯訓誡書互相講習以爲法戒兵部久闕尚書潛署部事一切訓飭事宜皆承旨行之尋進尚書廣西都司建譙樓青州衛造軍器擅科民財潛請凡都司衛所營作必都督府奏准官給物

料毋擅役民違者治罪仍禁武臣預民事干戈甫息武臣暴橫數扞文法至是始戢潛力也帝嘗論致治之要在進賢退不肖潛因言君子常少小人常多在上風厲之耳賢者舉而不仁者遠若太陽出而羣陰伏帝善其言二十三年以潛與工部尚書秦逵換官賜誥獎諭尋復其舊後以事免明初衛所世籍及軍卒勾補之法皆潛所定潮州學生陳質以父戍籍勾補請歸卒業帝令削其兵籍潛曰削其籍則缺軍伍帝曰國家得一卒易得一士難軍缺伍少一力士耳獎成賢才以資任用其繫豈不重乎乃紕潛言削其籍

開濟字來學洛陽人嘗自比賈誼元察罕帖木兒徵掌書記洪武初以明經舉授河南府訓導入爲國子助教與丞相胡

惟庸善以疾罷歸訓徒里中十四年御史大夫安然薦濟博通經史有吏治才名試刑部尚書踰年爲眞濟以綜覈爲已任請天下諸司設文簿日書所行事課得失又各部勘合文移立程限定功罪又言內外議獄章奏動數千言泛濫無紀失其本情宜令諸司著成式頒示中外無用煩文出入人罪又言軍民以細故犯罪者宜卽決遣數月間滯牘一清帝大以爲能會都御史趙仁言曩以賢良方正孝弟力田諸科所取士列置郡縣多不舉職宜覈其去留濟條議以經明行修爲一科工習文辭爲一科通曉書義爲一科人品俊秀爲一科言有條理爲一科練達治理爲一科六科備者爲上三科以上爲中不及三科者爲下從之濟敏慧有才辯凡國家經

制田賦獄訟工役河渠事衆莫能裁定濟一算畫卽有條理品式可爲世守以故帝益信任數被顧問兼預他部事人以是忌之謗議滋起濟機深好以法中傷人帝嘗命定詐僞律濟議法巧密帝曰張密網以羅民無乃太刻乎又設籍曰寅戌之書以程僚屬出入帝切責曰古人以卯酉爲常今使趨事者朝寅暮戌奉父母會妻子幾何時耶又爲榜戒其僚屬請揭文華殿帝曰告誡僚屬之言欲張殿廷豈人臣禮濟慚謝尋令郎中仇衍脫囚死爲獄官所發濟與侍郎王希哲主事王叔微執獄官斃之御史陶厓仲等發其事且言濟奏事時置奏劄懷中或隱而不言覬伺上意務爲兩端奸計莫測役甥女爲婢妹早寡逐其姑而畧其家財帝怒下濟獄併希

哲衍等皆棄市

秦達字文用宣城人洪武十八年進士歷事都察院奉檄清理囚徒寬嚴得體帝嘉其能擢爲工部侍郎時國家初定營繕事繁部中缺尚書達以侍郎署事大興作多領之初工部欲籍諸工匠驗其丁力定三年爲班更番赴京三月交代名曰輪班匠議未行達復議量地遠近爲班次置籍爲勘合付之至期齋至部免其家徭役著爲令帝以達勤勩詔有司復其家嘗命修闕里聖廟二十二年進尚書古帝王廟界通衢帝患其褻命徙建於欽天山之陽廟成丹繪輝麗帝甚嘉之明年改兵部尚書未幾復改工部帝以學校爲國儲材而士子巾服無異吏胥宜甄別之命達製式以進帝務求典雅凡

三易其製始定賜監生藍衫條各一以爲天下先明代士子衣冠蓋創自達云有趙翥者永寧人有志節以學行聞由訓導舉賢良擢贊善大夫善啟廸帝嘉之拜工部尚書奏定天下歲造軍器之數及議定藩王宮城制度趙俊者不知何許人自工部侍郎進尚書帝以國子監藏書板刻歲久殘剝命諸儒考補工部督匠修治俊奉詔監理古籍始備洪武十二年翥改署刑部尋致仕去俊十七年免而達於二十五年坐事自殺

楊靖字仲寧山陽人洪武十八年進士選庶吉士試事吏科明年試戶部右侍郎尋授左時任諸司者非進士卽太學生有不法者帝誠諭之製大誥曰通政使蔡瑄左通政茹瑺戶


部侍郎楊靖工部侍郎秦達亦進士太學生也能率職以稱
朕心朕尊顯之不數年列於羣職之上其犯罪不悛者終至
殺身詎不哀哉靖見重於帝如此二十二年進尚書明年詔
在京官三年皆遷調著爲令乃以刑部尚書趙勉與靖換官
論曰愚民犯法如陷飲食嗜之不知止設法防之犯益衆推
恕行仁或能感化自今惟犯十惡并殺人者死餘罪皆令輸
粟北邊又曰在京獄囚卿等覆奏朕親審決猶恐未當在外
各官豈盡得人所擬豈盡當罪卿等當詳讞然後遣官審決
靖承旨免獄多所平反帝嘉納之嘗鞫一武弁門卒檢其身
得大珠僚屬驚異靖徐曰僞也安有珠大如此者乎碎之帝
聞嘆曰靖此舉有四善焉不獻朕求悅一善也不窮追投獻

二善也不獎門卒杜小人僥倖三善也千金之珠卒然而至
畧不動心有過人之智應變之才四善也久之兼太子賓客
坐事免會征龍州趙宗壽詔靖諭安南輸粟龍州以白衣往
安南王幼不通語言政事皆其相黎一元出陸運險艱頗不
奉詔靖反覆論一元述帝威德且許以水運一元乃輸粟二
萬石至淹海江別造浮橋以達龍州帝大悅召靖爲左都御
史靖公忠有智畧善理繁劇治獄明察而不事深文寵遇最
厚同列無與比有鄉人繫獄擊登聞鼓訴狀靖代改狀草爲
御史所劾遂賜死年三十八時論惜之明初士大夫以功名
終者少吳人嚴德珉由御史擢左僉都御史以疾求歸帝怒
謫戍南丹黥其面遇赦放還布衣徒步自齒齊民宣德中猶

存嘗毆悍軍軍訟之御史德珉跪堂下自言曾在臺勾當公
事曉三尺法御史問何官答言洪武中曾為臺長所謂嚴德
珉是也御史大驚揖起之次日往謁則擔囊徒矣有教授與
飲見其面黥戴敝冠問老人犯何法而黥德珉述前事因言
先時國法甚嚴仕者不保首領此敝冠不易戴也乃北面拱
手稱聖恩聖恩云

凌漢字斗南原武人洪武中以明經舉至京師獻烏鵲論帝
善之授司經局正字出為會稽知縣以事逮繫久不決按察
使陶晟入覲帝知漢無罪為晟所淹命釋之召為御史巡按
陝西疏所部疾困數事且曰古人謂大夫出疆有安國家利
社稷者專之在春秋戰國則可今大一統則不可苟許其專

恐啟大臣擅權之漸帝善之召其子賜鈔二百錠衣一襲及
還京師有德漢者邀置酒欲厚報以金漢曰酒可飲金不可
受帝聞之嘉嘆擢右都御史時詹徽為左論議頗不合每面
折徽徽銜之奏遣按事蘇松因嗾御史桂滿劾其失職降刑
部右侍郎未幾命署吏部已改禮部復為徽所劾貶左僉都
御史帝憫其衰令歸田里漢叩頭曰臣願生居京師死葬此
土許之居歲餘起左贊善又歲餘復擢右僉都御史尋令致
仕漢入辭帝問先賜歸不行今歸何也對曰詹徽在臣有後
憂今伏誅矣臣故敢歸耳漢有治才廉直為帝所知然出言
不檢持為時所少故居官數起數仆云



史葉

寬政戊午

敬溫堂

明史稿

列傳第二十一終

士有之... 田里... 京師... 金... 西... 終

